

平
播
全
書

平播全書卷七

明長垣李化龍著

咨文

咨貴州撫院防播

爲督撫地方事照得播酋邇來狂悖大非往昔親自統兵屯劄於蜀綦地界擾害居民彼處防禦官兵又虞單弱業經調遣總兵官萬鏊馳赴外查得此酋近日又復集兵擾犯黔地愈肆垂涎已行各該道將查報訖若該省一應設備與當興革事宜本部院難以遙度相應移會爲此合咨貴院煩請查將鄰播一帶去處目前防禦官兵有無足備

應否增添與歧路設險扼隘挖塹偵探收保城守并通省時宜興革事干奏請者陸續希稿見示以憑會題儻有徑行事件亦希備細移送軍門以便查考幸勿遲緩

咨浙江山東借兵

爲土酋肆逆蜀地阡危請乞量借兵力以資防禦以保封疆事本月二十一二等日據兵巡上川東道副使莫睿并重慶府及參遊等官各報稱播酋楊應龍於六月內點兵六萬分爲三路入犯綦江內地先講地方事後撕殺乞發官兵立候分布防守又據報稱楊應龍親自統兵數萬在貓兒岡等處劄營又在母渡入犯離縣止二十五里今守

兵止有三千勢甚至急各等因節報到部爲照楊應龍恃其地利之險兵力之強睥睨全蜀無足以當其鋒者其蓄志欲逞久矣年來假以擒拏叛奴一犯合江再犯綦江殺掠之慘節經奏報然猶未敢悉師以出也自貴州喪師之後自知難追天誅遂爾逞於一決乃親統大兵數萬復犯綦江恣行殺戮結營不去益增生兵蓋欲殲我兵將占我邊隅然後略地攻城惟其所向此其爲志端不在小蜀地原無兵馬向來征討止調土司而土司之中惟此酋爲最强往日已事可爲殷鑒本部入蜀未及旬日召募訓練一無所施不得已遣總兵萬鏊量摘松潘兵馬前去重慶一

帶相機防禦本部續調土兵數枝接濟顧強弱之勢已自可知儻我兵稍挫賊勢益張滋蔓之禍且在全省茲所關係豈細故哉查得浙江南山東之兵天下稱勁年來東征全賴其力今東征竣事業已歸農召募用之極爲相當除另差官齎銀召募但此中事已然眉彼處旋行召募曠日遲久無補急需查貴鎮有防海及標兵二枝兵將見在今海波已澄備而不用合行借調除具奏外諒朝廷之上見此情形無不允發之理但待報遣發尤恐後時合先咨請希將前兵令驍將統領全營撥發前來應給路費量行支給待此中解銀補還若貴鎮兵不可缺不妨徐募已撤東

征之兵填補移緩就急兩不相妨昔甯夏之變浙中聞常撫院曾遠遣三千兵赴援大義精忠日星並耀料貴院體國奉公之心決不憚披髮纓冠之往請勿遲緩

咨陝西各鎮借兵

爲土酋肆逆蜀地阡危請乞量借兵力以資防禦以保封疆事本月二十一二等日據兵巡上川東道副使莫容并重慶府及參遊等官各報稱播酋楊應龍云云同前查得陝西各邊兵馬素稱驍健本部向擬借調緣秋防在即未敢具陳顧今事勢已急計無復之只須量借除一面具奏外諒朝廷之上聞此情形無不允發之理但待報遣發尤

恐後時合先咨請希將貴部院所屬四鎮每鎮量摘撥二
三千令彼中驍將統領各帶甲馬器械量給行糧速遣入
蜀俟本部一面解銀補還入蜀以後糧料本部一面預備
又查得延綏一鎮舊有入衛兵馬一枝三千年來借調東
征不係本地防守之數今東征已畢薊鎮無事更希全營
發來要在十月之間畢至蜀地方爲有濟昔年有調苗兵
禦虜者胡騎一呼踏爲平土酋所恃惟生苗非陝兵不足
以殲之亦知秋防在目彼此皆急願貴鎮地大兵多摘撥
一枝如九牛一毛無足加損其在蜀地則救焚拯溺宏濟
爲多料貴部院體國奉公之心決不憚披髮纓冠之往請

勿遲緩

咨兵部討將官

爲播酋猖獗蜀事阽危乞多發將才以備戰守事照得播酋不道擾我封疆綦江被殘重慶告急全蜀事勢未知所終此亦危急存亡之秋也蜀原無兵故亦無將近雖調發土司之兵而土官紀律不嚴未必用命雖亦多方招募而烏合之眾須得良將統領始可收功至於別省調兵彼中雖有驍將未必便肯遣來臨時須有更置亦不可不預爲之備者卽坐名題請但本職於九邊將帥未能全知又恐諸將中有事故不一不能應手卽至返致誤事相應咨請

爲此合咨本部煩將後開本職所訪聞謀勇足備可用將
官轉咨各處督撫衙門刻定限期責令起送前來或帶有
家丁隨共多寡本處衙門卽給與應付勘合抵蜀之日自
當從優給養俟各將到後本職隨其才器分遣督兵事甯
之後另議陞賞仍行各處督撫衙門此番所需將才不啻
救焚拯溺不得以本處有急爲辭遲留不發致誤事機至
於後開各將或近有顯過著聞難以重用或本部所知另
有長才大器在諸將之上而本職所不及知者亦乞隨宜
改易止在得人或各將有見居重地勢須題請者亦乞查
照咨文徑爲題請仍希將所遣發過將官先咨知會以便

行催須至咨者

計開

薊遼總督標下副總兵戴延春

薊遼總兵標下遊擊葉邦榮

大同井坪城參將錢煜

延綏入衛遊擊王國棟

原任保甯參將郭有光

河州革任副將周國柱

河西原任參將余世威

山西原任東路參將余德榮

甯夏副總兵馬孔英

洮岷副總兵魯光祖

西甯參將王國柱

京營遊擊陳蚤

原任京營參將藺登瀛

咨湖廣撫院防酋

爲緊急軍務事近據兵巡上川東道副使莫睿報稱播酋
楊應龍於六月十八日親統大兵屯劄於綦江內地日肆
劫掠要攻綦城又聲言添苗入犯重慶等處等因到本部
院除行見調赴重慶總兵官萬鏊同該道加謹隄備并一

面調取漢土官兵馳至該府一帶分布防禦外爲照播西
楊應龍狡詐異常近見明旨重頒遂致疑畏日深跳梁益
肆卽今縱橫無忌不知意欲何爲查楚省逼鄰偏橋一帶
均爲內地襟喉未然之防亟應料理爲此合咨貴院煩請
速於有勇兵處所無論漢土急募數千於鄰播要區分布
防守仍戒嚴將領有司衛所比常加謹隄備用保無虞應
造器械軍火甲具行司專官製造應動銀兩與集兵合用
糧餉該司一面酌定通詳一面遣發馳赴慎守仍請希將
責成過將領等官緣由并委過募兵職官姓名先行移送
軍門幸勿遲緩

塘報播事

爲緊急夷情事照得播惡楊應龍統苗攻破綦江殺戮將
兵緣由已於萬曆二十七年六月二十八日具題訖本年
七月初四日據重慶府申據綦江縣報稱六月二十一日
播酋親率兵苗六萬圍城與房遊擊張良賢對陣亂拋火
石城頭火起各兵難立一時滾下城牆苗兵直入當卽殺
死房遊擊張良賢蔣百戶生擒胡提調孟百戶其餘各官
逃亡不知所之殺死兵民不計其數一時堆屍塞街打入
縣堂殺死吏書阜快及避難街民一百餘見本縣帶同家
眷十一口正衣冠端坐在堂止殺死義男一人義女一人

打入後堂將什物一掃劫去次打入監房將各囚放出各令投順去次打入官庫先將外庫銀罄劫將內庫銀留數百勇兵看守圍裏自夜達旦二十二日早差出把總李旭何漢良將官庫銀檢過二千盡數持去仍根要庫子及避難街民湯禮等立一領契逼本縣用印將銀二千作賞兵之費次卽打倉眾兵各依倉就食復懸牌內云本司率兵到綦路遠不便運餉將綦江縣庫貯銀兩倉貯米穀盡數借支無得阻難取罪二十三日放火燒城內官民房約有百餘家二十四日與本縣會話要改勦爲撫又要取各奏民及楊可棟屍棺要擡本縣到州作質事平之日方送還

縣本縣毅然以死自許彼亦不能因辱二十五日早起先
放火燒倉次卽燒營鎖押目把十餘人進縣直入後堂拏
本縣親子馬兆斗親舅許雲龍到營一路隨帶退兵三溪
今將前項逐一緣由因苗兵阻截片紙隻字難以上通擄
去男婦不計其數并所屬巡司東安二驛家眷除查明另
行申報外等因擬合申報又於七月初九日據敘馬瀘兵
備道副使李廷謨報稱本月初五日午時准建武遊擊楊
敏政手本報本月初一日亥時據五畝堡指揮王繼祖揭
報本日午時聽夷放銃未時據哨探軍兵李啟等探得夷
目趙林鶴統袁謨袁鼎袁年王繼先等兵又吼灘小溪等

處兵見有千餘在龍門里劄說等播兵到齊就要一衝五畝堡等情本時又據探報隊長奚老三報稱探得楊應龍封刀一把要殺趙林鶴稱綦江已攻了緣何不打合江等情初二日夜四更時分又據塘報張廷舟報稱三更時分趙林鶴統袁謨等兵分爲三路黑夜難知其數一由大油溪一由虎巷子一由磨刀溪俱向五畝堡衝來王指揮督率軍兵堵遏因馬邊兵尙未到見得勢力不敵退至小寨坎夷兵將五畝堡圍住大叫要拏王指揮當時將近居民房燒燬又叫取草燒堡等情又據王指揮差人謝乾報稱相同除本職督率官兵堵遏外查得馬邊兵奉瀘州調撤

各兵連夜撤出已過馬街河合就移報又據合江縣申報
相同除本道一面差人持牌曉諭馬邊兵不許觀望著令
奮勇與王繼祖出哨并行令楊遊擊相機策應堵遏用保
無虞一面催發宜賓囤兵督赴瀘州應援外理合呈報七
月十八日又據分巡上川東道副使莫睿報稱七月十三
日據綦江縣申本月初十日據本縣三溪住民羅可助羅
枝羅從友羅守用係生員羅舟羅雍羅子澤羅允羅蜀義
男告稱楊酋自破城之後一向割營三溪母渡等處又於
初八日將三溪田地沿邊插旗爲號播界自某處起某處
止鑄一石碑豎立界口號爲宣慰官莊且將各民房拆毀

改作倉廩擄去男婦數百餘口劫去財物數萬餘金該本縣看得逆酋肆行無忌混占民地拆毀民房將使一方之民居食無賴矣殘破餘黎何由復業等因申報到道各轉報到職看得逆酋初出聲言攻打綦合直取重慶比綦江旣破劫奪倉庫虜掠人畜未免遲回數日因之內地兵將漸集聲勢漸壯賊遂遷延不進乃分遣生苗焚劫堡寨又越播境五六十里之外三溪地方插旗豎碑將內地民居占爲官莊狂逞已極悖逆益甚除益督發土漢官兵分布鄰播州縣聯絡防禦及行胡貴二省邊播一帶道將各嚴督軍兵把截險隘以防潰決突犯外合行塘報

咨湖廣備糧餉

爲督撫地方事照得湖廣偏橋清浪鎮遠平溪等處俱與播酋切壤應用謀勇將官精兵防禦業經移咨貴院及徑行布按二司及湖北辰沅等道計議將兵及糧餉機宜等項不啻再三俱未見回覆殊爲可慮頃楊酋犯綦之後仍在集兵聲言要犯湖貴地方則偏橋等處亟應防守緣添設兵將備置糧餉本部院行文旣久計此時分布停妥惟是本色糧米尤當多備理合移咨爲此合咨貴院煩行湖廣布政司動支軍餉銀兩趁此秋成之際收買本色糧米要足官兵三萬名半年之用專委督餉一道責成各屬克

期羅完運赴鄰播應守地方聽候支給官兵幸勿遲緩仍請將委用督餉專道并分催各官及買運米數收貯地方各緣由備咨軍門查考併再檄催司道將節行會議各項事宜速議明悉作速通詳以憑施行

咨貴州責安疆臣

爲督撫地方事萬曆二十七年七月二十一日據兵巡上川東道副使莫睿呈據涪州申爲四路阻寇邀截奏章綁戮差役實難安堵事本月十二日准播州宣慰司批差頭目云云等因到本部院爲照播酋楊應龍近日狂逞大異往昔旣戕犯黔省官兵復攻陷蜀中縣治戮將屠兵聞者

三才圖會卷一
一
愕豈非天道好還此賊殺虜數多天欲稔其惡而斃之
伊自知惡積罪大欲以恐嚇官兵乃令頭目部落極口
稱貴州水西助兵一萬攻我綦城先據各衙門節報前
本部院久知鳳氏母子素懷恭順較之楊酋何啻霄壤
不信以爲眞且曾見邸報黔省按院題疏亦有安疆臣
順之詞乃今該酋以結親之故託言水西聲勢誇兵稱
但知自張聲援不顧駕禍鄰封機械變詐不可方物誠
痛恨若不詢求虛實將來桀疑黨奸何以服心應合移
爲此合咨貴院煩請轉行司道詰詢安疆臣及伊母鳳
曾否與楊酋添兵助虐有何深恨夙隙將此逆情駕禍

於渠若前所云皆非真實是何播目揚言貽安氏母子陰受無窮之禍仍令疆臣速示譯諭頭目及鄰播部落毋得輕聽播酋詭計誘惑厚賄結心暗幫爲虐嗣後日久論定情形必露伊時追悔噬臍何及希將詢過有無前項情由移送軍門以憑施行

咨雲南調兵

爲土酋肆逆蜀地帖危請乞借兵防禦以固封疆事本年六月十一日本部院入蜀省受事隨據兵巡上川東道及將領等官疊報播酋楊應龍集兵內地侵掠騷擾本部院卽檄行道將等官嚴加固守無爲輕敵及一面四出徵調

漢土官兵計議防禦又遣總兵萬鏊馳赴重慶分布防守堵截詎意狡酋於二十二日親督大兵直抵綦城與將官決戰遂致綦江城陷官兵被戮勢甚披猖爲惡殊慘緣此酋頻年爲患三省不甯頃自貴州喪師之後自知難追天誅遂爾逞於一決此其爲志端在不小原蜀中素無蓄兵雖松潘開鎮兵數不多卽今秋防虜警猶自不敷以故向來征討止調土司而土司之中惟此酋稍強各土司無能與之抗者惟是貴省元江甯州羅雄武定等處土兵素稱驍勇堪以禦敵且查萬厯二十七年六月內准兵部咨爲播患方殷軍機至重等事該本部題稱川貴湖廣地界相

連殆若犬牙交錯合無於貴州總兵請敕責任湖北川東
地方凡有事調遣不許抗違等因閏四月內奉聖旨貴州
方在用兵總兵官所轄准照巡撫事例湖北川東參將守
備軍衛土司俱聽兼制有事調遣不許抗違無事只照常
行改寫敕書廣西雲南與貴州接境去處也著協力援擣
不許互分彼此欽此今照敝院叨總制三藩軍務勢不得
不借調前兵用資戰守爲此合咨貴院煩念滇蜀鄰封正
需披纓拯溺之際請將前項土兵責成該管土官挑選二
萬再加訓練候本部院另文調取之日令各備鋒利器械
再請行委謀勇將官一員督同該管土官管押各兵前來

聽令分布其行糧煩查滇中用兵則例同轉行過土司選兵緣由希先見示以憑查照臨調解給施行幸勿延緩

咨黔省撫院趁時糴米

爲軍務事照得播酋近雖稍靜但戎心無厭爲謀叵測前又曾聲言要犯貴州龍泉等處在我防禦自宜周密近准貴院回咨地方設防應布將兵與扼險隄備漸有次第雖兵尙不足陸續募調猶易爲力惟本色糧餉一節乃目前急用之需諒貴院久已計處先該本院節行貴州布政司預計買備及今製造器械火藥等項去後未見回報會否酌行今據該司揭稱庫貯堪動軍興銀兩數目不上萬計

與雲南應還川省解黔銀兩應否動支糴買糧米亟應乘時酌處又查該省往規上納事例等項儻中間如係折色或照川中近例可以暫改本色亦應亟行庶得濟用爲此合咨貴院煩行該布政司將庫貯見存并雲南解還銀兩應動若干趁今時熟通詳速委官員照依時估多買米穀製造如法收貯近便倉廩若事例等銀應否隨宜改上本色俱聽酌處施行其應製軍火器具亦速行司查照原行製造仍將買過米數軍火器具先行希由移送軍門幸勿遲緩

咨催湖廣買餉米製火器

爲軍務事照得湖廣偏橋鎮遠清浪平溪等處地方與播界比鄰應用將兵防守須時刻不可懈弛軍中所需日食糧米器具等項節經移咨貴院及牌行布按二司湖北守巡辰沅等道計議去後俱未回報又於七月內移咨請行該布政司動支軍餉銀兩趁時收買本色米石計足官兵三萬名半年食用責令委官買運聽支去後亦未回覆今照防守事在孔亟該省調發官兵畢集彼中應用本色糧餉貴在先期布置又軍中利用必須火器不知該省製造若干擬合一併查催爲此合咨貴院煩請速行該司道查照原行將三萬官兵足用半年餉米動支官銀專委督餉

道責成職官剋日買完運赴鄰播相應地方聽候支用此時秋成正宜糴貯不得遲緩後時費事其軍火器具最爲要務應委慣造員役不分晝宵多方製造至於偏橋等處分布將官軍兵業已不次移咨貴院第未見如何安設仍煩督行該道及將領統兵等官一面整搦防守一面設險偵探仍將分布將兵買完餉米製完器具各數日咨報軍門以憑查考施行幸勿遲緩

咨貴州巡撫增議防兵

爲緊急軍務事准貴州巡撫郭咨准本部院咨查分布將兵隄備鄰境播酋緣由隨准開款同稱貴州防兵共三千

已到一千七百未到一千三百平越衛有兵一千六百已
到一千一百未到五百興隆衛有兵三千一百已到二千
二百未到九百偏橋衛有兵五千已到二千七百八十九
名未到二千二百一十一名黃平所有兵一千九百已到
一千六百未到三百新添衛有兵一千已到五百未到五
百清平衛有兵三百俱未到龍泉地方有兵一千二百已
到一千未到二百等因到本部院查得會省重地所稱防
兵止有三千黃平龍泉深入播地各止兵千餘且有未到
者卽今叛酋舉動若此似應再加增設及查思仁石阡婺
川等府縣俱切近播地未知應否設兵相應再行會議爲

此合咨貴院煩請酌議將省城黃平龍泉等處應否再增軍兵若干思仁石阡婺川各處卽今有無官兵防守且彼處二府一縣去省城寫遠又隔湖廣偏橋地方止一龍泉守備聞其地又無城郭兵止有千餘恐不足爲一方保障應否再設兵將希一面分布一面移知軍門以便議題其未到軍兵會否催到一併移知希勿延緩

咨貴州防石阡

爲地方事本年八月十三日據貴州布政司帶管分守思仁道左布政使應存卓呈據石阡府申報七月初八日據龍泉坪長官司報稱本月初二三四日連據各哨把總報

稱播苗破劫石籬門又於馬頭山點兵數日但言伺候楊
應龍令箭至日每兵草鞋一雙飯米三升不知何幹看係
地方事情合行申報等因看得石阡孤城切近播境萬一
逆酋衝突無將無兵何以防禦合行飛報緊急乞賜遣將
隄防等因報道具呈本部院據此除行總兵官加謹隄防
外案照先該本部院移咨貴院煩請查照先今事理行令
貴省司道將鄰播一帶地方專司信地官兵將防禦事宜
注意講求比常萬分隄備仍令各參遊守備等官各帶多
兵往來鄰邊處所巡警免酋窺知內地虛實又不許爲彼
誘敵致貽後患諸凡一切未盡應分布應備辦等件口早

爲施行去後隨准開款回覆前來查得鄰播去處俱已設兵雖多寡不一稍可隄備惟石阡府旣近酋境未見分布何項官兵防禦今據前因看得播酋縱兵屯聚難免衝犯石阡要路宜速緊防爲此合咨貴院煩亟酌議何項官兵於石阡府防禦或已分布或調取未至作何料理可保無虞希速回覆幸勿遲緩

咨河南催兵將

爲軍務事本年八月二十五日准兵部咨該本部題川省督按奏播逆猖獗及添置將兵等項已該臣部覆奉聖旨欽遵外所有關軍機用人行事當蚤爲計料內一款開備

用將領查得河南去川貴湖道路頗近而彼中舊有毛葫蘆兵精悍可用臣頃過河北見有領兵官任承爵甚爲驍雄堪以戰陣及查本官係原任掌印署正留守近因罪廢充爲事官合無准其量復遊擊職銜卽令選帶毛葫蘆或本營自練兵馬隨便器械不拘數千剋日統領星馳前去川貴總督調度隨地勦殺合用安家行糧河南撫院查照調兵事體一面速行處給一面奏請銷補等因奉聖旨是備用將領兵士增置總兵中軍俱依擬欽此備咨到本部院看得播酋楊應龍自攻陷綦江縣治戕殺將兵之後自知罪惡深重難追誅討日在挖塹修船謀爲叵測所需將

兵不啻然眉之急既今本部題允將遊擊任承爵帶毛葫蘆兵前來備用但未見起發應合移催爲此合咨貴院煩請檄行該道府將前項毛葫蘆兵及本營自練兵馬兵挑選驍健三千名務要人人慣戰一可當十各帶衣甲器械責令任承爵統督如兵眾多再委勇將一二員分隊管束星夜到川其官兵行糧安家照部議就於該布政司支給具奏請補但須官兵蚤到以濟急用至沿途束兵號令煩爲照例頒給本官禁諭施行先將起發官兵日期支過餉銀數目一併見示以憑咨部幸勿遲緩

咨貴州防守思石地方

爲督撫地方事近據貴州思石兵巡道呈據石阡府經歷
司呈報七月二十六日據龍泉司申稱播苗在於馬頭山
偏刀水都等處剗營不知動靜又將先年李保等造叛地
名黃沙坎要路挖爲溝壕又據石阡司報稱七月二十三
日被播目楊七等統兵七百在鎮夷關外濫泥山燒劫殺
死張廷華父子并鄰民七命合寨牛馬財畜盡行劫去虜
掠男婦四十餘人隨統鄉兵趕退口稱不日打關破府此
關近乾溪三里離府止三十里又據石阡司呈報播目四
牌謝朝俸石辰三於本月二十三日統兵千餘剗營崖門
揚言集兵過江下埽水口崖抵本莊樂橋軍民屯寨上劫

思石府衛偏橋等處各緣由到道呈報本部院看得馬頭山偏刀濫泥山崖門等處俱係思石二府所屬地方今播目集兵劄營洶壕挖路又聲言過江打關破府其中包藏狡不可測先該本部院查得石阡府未見設將增兵隨經咨移貴院調發分布未見回報在龍泉司僅有額兵一千近議新召二百又未募完本部院屢行每處用兵三千隄備未見如何安設今石阡地方濫泥山居民已被夷兵燒殺搶虜此地去府只二三十里并無官兵堵截止有鄉兵趕退疏虞可知卽今防範正宜加謹乃二府地方泄泄如此萬一誤事責將安諉除檄行總兵官并思石二道查照

屢行隄防外應合移咨爲此合咨貴院煩請卽便查照轉行該司道府及總兵官思石將領等官督率部兵將各該所屬地方日夜加謹防守不許時刻懈怠仍不時遠偵聲息以防不虞如遇賊出各該將官軍兵相機堵截毋得輕躁爲彼誘入該府濱江一帶旣係通播要路尤宜集兵把守毋容越過延蔓不使其各該緩急應添設將兵煩查原議上緊調發分布卽今酋疑畏日深防禦事宜務須戒嚴所司以防衝突幸勿遲緩

咨廣西調兵

爲緊急軍務事本年八月二十七日准兵部咨該本部院

題爲循例請設兵將以重事權以資戰守事本部覆議今
應比照先近申明事例調用浙江福建陝西雲南廣西兵
將俱聽其便宜調用文至各鎮卽日依行毋容緩誤但須
臨機酌量調取務求停妥查其真實可用而後調之或氣
習脆弱不可忝調以貽日後撤兵之害雲南巡撫會同總
兵沐叡糾合義旅選委慣戰將官統領於貴州地界邀會
廣貴各兵覆其巢穴廣西總兵陳璘馬上催促由湖廣取
道直趨粵西聽援不許繞路粵東有誤纓冠之義其餘前
項之兵果有安家銀兩俱聽該鎮借給卽行川湖補解行
糧計日給發一切軍興廩費糧餉督臣徑自議處通行各

鎮省督撫衙門一體遵照施行等因覆奉聖旨該鎮督撫
新設事權宜重云云除欽遵外看得播酋自攻陷綦江縣
城之後惡逆愈張叛形日肆卽今川中雖調集漢土軍兵
爲數頗多其強弱之勢難以顯言今旣題請特以貴省兵
馬調用應合移請咨發爲此合咨貴院煩請查照欽依內
事理速將素慣戰征勇健精兵挑選一萬名令見任驍勇
將官或廢閑者一二員刻期分隊督押星馳前赴貴州聽
該省撫院及總兵童元鎮分布以資急用其各兵例有安
家及行糧等項希照部議覆奉欽依於該布政司庫貯銀
內借用散給俟川貴一一補還希由同覆施行往時廣中

狼兵行路多不安靜仍乞選一風力文職監押前來庶免
他患尤見一體之誼此係萬分緊急軍情卽日出師事理
幸勿遲緩

塘報播事

爲塘報夷情事萬曆二十七年八月三十日據貴州清浪
參將劉效節呈報七月初六日本職經過東坡站親見高
岡苗人嘯聚詢查來由據該站官軍稟稱時常三四十人
身騎大馬往來擡頭擡臘等寨不敢盤詰等情初七日又
據黃平各官稟稱播苗聲言攻打大瓮任地爛橋白計常
甯白憂瓮口等處初八日又據偏橋衛指揮張拱極等揭

報偏橋司管下白泥寨苗頭李宋執竹木刻來屯報稱播
州馬兵五十步兵五百見劄翁角隆使令擡臘寨苗頭謝
保計明來我白泥取討過山錢又叫我寨苗歸服他放路
過如不歸服卽就殺擄等語又據軍人雷文爵報稱播州
頭目趙仕登將湄潭餘慶起至烏江止又自烏江起至白
泥止一帶路道令路傍人民砍修各寬一丈又點兵數千
各造京青包巾飛帶紅甲妝扮似官兵一樣令備草鞋三
雙米七升不知何爲等情本月十一日又據平溪洞民人
唐俸奇稟報播目謝朝俸點兵七千各備飯米五升腦包
五斤縣被八斤草鞋二雙鋤刀并鋒利器械點完不知何

爲又據哨探楊春稟報白泥楊七召到苗兵二三千本地
民兵二千將附近民房拆起馬房一百間候播州兵到又
據興隆衛鄉導陳大林稟稱石勝俸身穿大紅服色在於
擡頭寨阿傳家歇隨帶五十餘苗過九股糾拽各寨諸夷
尙近千人等因到職看得黃平孤城偏僻四面受敵之處
環列皆夷包裹近召兵六百名防守奉文減去三百實存
三百與龍泉募兵二百名宣威營一百名哨兵二百名在
所食糧軍人三百名總共千餘不足防守十八日又據清
鎮守備史良將揭報本月十七日據偏橋衛揭稟據鄉兵
莫六文大昆走報鷄婁山許五奔稱惡苗千餘鳴鑼張旗

攻打本屯放火鄉兵對敵奈苗勢重難以抵敵轉報本衛
催兵救護等情先據施秉哨把千戶侯仲爵差兵報稱播
酋砍牛糾苗欲於七月十四五六日要來攻劫偏橋等語
各職聞報卽稟本備蒙督同各職倒樹塞路修城挖壕各
官兵整備堵截各苗見得官兵到彼漫散去訖查得鷄婁
山被燒葉朝暘等二十二家殺傷軍舍鄉兵朱五等十七
名口內重傷三名輕傷一十四名當卽安諭各家調治衛
城幸保無虞等因又據鎮遠衛指揮尹節何天寵稟報本
月十三日戌時據瓮沙住民田應高劉應魁報稱有播州
楊應龍令楊七帶領百十餘人人馬到容山剝牛會話糾

拽惡苗數十稱言攻打地方不知何爲等情又准鎮遠府
手本據大塘哨呈報本月初十日據鄉導蔣朝忠等不次
報稱先日江外前往白泥三千多苗各散同寨近日又被
播酋暗差目把殺人復入容山等處剝牛會集欲打鷄婁
山又打巴團哨一帶地方等情本月十七日又據施秉縣
後山哨把總千戶侯仲爵揭稟本月十四日夜數百餘苗
前來縣城外高聲吶喊放言叫軍民遠搬丟地方與他等
語隨該本哨發兵出敵見得苗勢蜂擁舉放火器攻退看
得縣城空虛兵少分布不週地方緊務稟報到職本月二
十一日又據偏橋衛指揮張拱極等揭稟本月十八日午

時據本衛大洪屯軍人曹興美報稱原撫苗千戶王光祚領大洪屯田去看收禾忽被偏橋司土官楊國臣下部屬惡苗謝保藉倚播勢虜去隨經官兵追趕取回訖看得近日楊應龍親自領兵攻犯綦江四牌惡目謝朝俸石勝俸楊七楊振邊夏提調等領兵侵犯屯堡遠隔不過三十里近止二十里又邀拽九股容山狂苗多三五百名少一二百名經過官道引入白泥起圍聚兵攻打衛城欲令官兵截遏恐惹挑釁矧偏橋告急之困旦夕不安等因又據重慶府駐鎮通判王三策呈報本年八月初三日據把總李朝陽稟據哨探兵楊再巧報稱鄰境地名通草塘馬路不

知何人砍伐通爲大路又謠傳播目謝朝俸在於草塘地名江界河找搭浮橋四路集兵不知意欲何爲等因九月初二日又據貴州按察司帶管思石兵巡道按察使易登瀛報據思石守備楊惟中呈報密查得播地高崖所都上壩修建營房二百餘間聚劄多兵楊應龍調取各巡警赴州宰殺牛馬豬羊將綦江拏來五司七姓本頭梟示歃血同盟聲言要攻黃平龍泉思石一帶地方勢甚危急又據偵探兵謝勇報稱播酋紛紛點兵各苗聲言先埽龍泉思石復攻黃平各處苗夷如出一口并據鄉導探報播酋於八月初一日祭旗發猖初三日發兵七月二十四日楊酋

差親丁叫三十六所巡警家丁上州又招拽九股生苗共兵十萬楊應龍親統黃平一路往龍泉思南又稱龍泉司治原係播州故土必要占奪賊勢甚是猖獗除呈報貴州兩院外合行稟報等因又據石阡府經歷陳廷範申稱本月初九日據石阡司巡捕吏目林中試呈據本司所轄地名水口渡住民彭希舜彭希堯拏獲播州細作一名馬良貴連人解司審據供係四川人先在石阡充當斧手住居水口二十餘年至萬曆二十七年正月十六日良貴卻過江投夷頭莫老明引見趙仕登住彼聽差至三月十五日趙仕登領兵二百五十欲得過江追拏毛守爵先令良貴

與白晝兒董政葉貴四人預來看船到於江邊白晝兒乘一便船過江悔心逃訖趙仕登續到隔江劄營箴箴要殺過江希舜親父彭大聰同鄉民楊科陳金德張仁隔江求和趙仕登陽許不殺彭大聰楊科陳金德張仁四人誤聽駕船一隻裝牛過江餽送不料趙仕登當將楊科砍殺將陳金德三人拏去播州俱被殺死意阻後日無人把江至今八月初一日楊應龍聽人謠言說龍泉司有兵三萬要勦播地楊應龍遂將四牌夷頭莫老明趙仕登羅廷鑾等家小拘入播州要出攻打各處地方分差伊親田相公領兵三萬攻思南趙仕登領二萬出袁家渡攻葛彰石阡楊

應龍親領三萬出烏江亦往思石會合莫老明預令良貴前來仍舊看取船隻良貴於本月初六日乘楊奎孟金祿便船過江探聽適遇彭希舜等撞逢拏解是的等情除行石阡府將馬良貴嚴究另詳及行各將領等官比常加謹防範外合行呈報等因九月初三日又據四川按察司兵巡上川東道副使莫睿揭報八月二十七日據南川縣申二十四日酉時分據差偵探應補向金甌等四名綠水村邊勇張正學等報稱蒙差前往東鄉村地名五里頭播界偵探本月二十二日寅時分苗兵數百劫擄男婦李顯宗張加爵等六十餘口斬殺李廷讚等男婦九人劫擄牛馬

八九十隻燒燬官廟岡河江井天池壩胡才正房屋五間
去訖合行轉報等因九月初六日又據兵巡下川南道參
議劉一相呈據合江縣報稱八月二十六日據哨探軍兵
張五楊榮等探得播目袁年趙林鶴在上赤水袁頂統兵
劄大魚灣又據黨正朱玉報稱袁年令部夷各備重九斤
紅絮被一牀重六斤腦包一頂要在二十七日點齊趙林
鶴說九月初一日要來下赤水袁年處并起集各里夷兵
欲於九月十三日出來攻打又據敘馬瀘兵備道副使李
廷謨呈據塘報李可德報稱楊正榮領五千夷兵在夷地
溝村劄營修統鎮所等因又據永甯參將吳文傑呈報九

月初七日差人探得楊酋發兵不知數目於初一日徑渡桑木凹大河至永甯宣撫司石寶寨屯劄口稱先打永甯赤水分兵攻打敘瀘納谿等處昇兵塘抵不住乞發兵救援又據兵巡下川南道呈據永甯土司守邊頭目王甫松等報稱八月十九日播舍楊兆龍張洪等領兵十七營擁將本撫緝麻山等處盡行燒劫殺擄男婦千口要借路攻打貴州赤水又據塘報雷得勝報稱探得播目王繼先令夷人各置重三斤白腦包一頂重九斤白絮被一牀槍桿俱用白限本月十三日點齊又有領兵官王承祖報稱楊應龍令王繼先造船三百隻今繼先止造一百隻護纜一

百五十圈楊應龍又發篋纜百餘捆出婁山關等因各報到職看得逆酋自知惡重罪深難逃天誅遣發苗夷蜂屯蟻聚川湖貴州鄰播地方無處無賊明欲水陸並進恣行搶殺大逆不道神人共憤除嚴行各該道將等官督率兵馬時勤偵探相機戰守俟再查有無聲息另奏外合行塘報

咨貴州集兵

爲緊急軍務事節據貴州思石兵巡道呈報播賊楊應龍調取各目赴州宰殺牛馬歃血同盟聲言要攻黃平龍泉一帶又招九股生苗十萬楊應龍親統往龍泉思南又稱

龍泉係播州故土要來占奪等情又據石阡府報稱播酋
令田相公領兵三萬要攻思南趙仕登領二萬攻龍泉楊
朝棟領二萬出袁家渡攻石阡楊應龍領三萬出烏江往
思石約會等因又據分守新鎮道都清地方民人王老三
在播走同說楊應龍領兵來攻黃平又據思石道報稱楊
朝棟分投出思石婺川龍泉等處造船一百隻只要攻思
石又據分守思仁道報稱楊酋帶兵去接九股苗兵往平
越剗營去貴州講理倉糧取在省并龍里等處七姓木頭
各等因呈報部院節經移行申飭司道將領等官隄備去
後爲照播賊到處稱兵要犯龍泉思石思南黃平等處其

爲叛逆殊可痛恨惟是調募軍兵分布把截最爲急務頃接部咨已將湖廣白蠟商稅二項共銀一十一萬三千餘兩滇中原借川銀內撥十萬兩俱解濟黔省軍餉本部院隨卽差人往滇楚二省催發前來外料在目下可抵黔中既有兵食卽可亟行調募應合移咨爲此合咨貴院煩請查照節行調募軍兵事理速行各該堪用土司如安疆臣蒙天眷獨山州等處土司可調或有司衛所驍健軍民可募通共挑選四萬並經本院已行文廣西撫院調取狼兵一萬一面催到聽總兵官及該道府會議分布如童元鎮尙未抵任希速差人守催一面揀選謀勇將官分投督領

鄰播地方緊要處所分布聽令施行其調兵在途行糧在川計程每名支銀一分五釐到營坐糧每散兵一名日支銀二分四釐每月七錢二分內除一錢一分關支本色米三斗餘支折色銀此皆本省土兵則例若外省客兵仍應從厚加給或該省別有則例聽從便宜但須早調齊足幸勿遲延誤事煩將調募過兵目分布把截地方一併咨報軍門以憑查考施行

咨湖廣儲集兵糧

爲軍務事准湖廣撫院支咨稱該布政司呈奉文調兵三萬預買半年糧米計每名日給米升半總約八萬有奇依

行辰常長衡四府備查各屬儲積倉穀磨米可得若干仍於司庫動銀五千兩買米一萬共約三萬有奇委官運貯辰沅近播地方以待需用餘少米石又俟陸續湊處解運接支至於火藥器具等項俟查處完日另行回報又稱督餉專任分守湖北道董理相宜惟軍餉無處不得已查將全書裁減銀米題請復派又請留各項錢糧自是餉有頭緒募調官兵俱已行道調度無誤事機等因到本部院准此爲照播賊作亂荼毒三藩本部院奉命專征要非得已仰廬貴院集兵應敵儲餉聽支足徵共濟之義但稱所調之兵雖有四萬之上內施州散毛等司一萬未准議及之

前業已徵調入川應聽此中分布京營鎮江等兵不知部議允否二枝之兵俱難算數若楚中進攻實非三萬以上不可卽今見在者止保靖麻陽土兵鎮筸鎮溪募兵共二萬耳尙少一萬不足三萬之數及查鎮麻土兵素稱多而且勇應於二處再挑一二萬若二處不敷另於有兵去處挑選務足前數庶克禦敵其監軍以分巡荆西道魏參議督餉以分守湖北道詹參政俱各相宜第本部院頃將分守荆南道胡參政議加按察使管理監軍業經具題所有貴省監軍亦應查照川貴事規額設二員協同兼理其擬兵務至於火藥器具如川中單開名色皆軍中不可少者

與夫見貯之糧止有三萬計數不多難敷半年之食乾糧炒米烘炒薑鹽等項俱應多備庶免臨渴掘井之虞爲此除行司道外合咨貴院煩請分投差官齎執令旗前去保靖麻陽鎮筸鎮溪等處各將前擬額調漢土官兵并本部院添調精兵共三四萬員名責令將領與同土官目把人等管押星馳前去沅州聽監軍胡魏二道與同總兵官陳璘到彼分布近播關隘嚴加防守聽候本部院約期進剿如陳璘尙未到任希照近行委原任總兵李應祥星馳前去代理見貯糧米三萬石亦卽行督餉詹參政督責原委監運各官火速運至沅州收候轉運營中聽支其軍開火

藥器具盛甲等件有者發去軍前備用無者上緊併工添造解發接濟至於不足糧餉與夫乾糧等項本折軍需價銀既經具題諒必俞允亟宜先行動支應分投收買者一面責成收買應轉解聽支者一面發去聽支此在督餉道一力經理以佐急用蜀中兵馬已逾十萬日費甚夥稍延兩日卽費萬金本部院卽目移駐重慶決策徂征大舉之期不出今冬矧貴院兵糧既有頭緒夾勦殊不爲難惟祈迅速庶克有濟幸勿遲緩

塘報夷情

爲塘報夷情事萬曆二十七年九月十一日據貴州分守

思仁道報據思石守備楊惟中報稱有國夫敖迎鑾在播
州修國同說酋子楊朝棟背生癰疽差人修砍大路直抵
錫落哨楊應龍領苗兵要攻思石黃平又據鄉導李瑕報
稱楊應龍喚取各夷頭巡警苗獠家小上州八月初六日
點兵初八日歃血酒估木刻楊應龍帶兵去接九股苗兵
一萬說要攻打黃平挾攜羅安撫往平越劄營親赴貴州
講理豐濟倉糧又說貴州城內井龍里等處挾取七姓本
頭等因又據分守親鎮道報稱差兵朱仲義報被播目謝
朝俸統苗將柑木山把截苗王老五丁鐵匠等家盡擄男
婦三十餘口綁去王老五老三老七三人鎖至謝朝俸家

空房內當有兩箇客人去報謝朝俸說黃平新築高牆內外挖壕各處劄兵要來殺你謝朝俸聽知欲來攻敵至夜王老三等走同報說四牌見有兵十七營楊朝棟於八月十二日起馬十七日領兵來攻黃平等因又據思石兵巡道呈據把總冉文燦報稱楊酋差夷目羅阿賓等夷都引屯包拽家小上國八月初八日剝牛歃血初九初十十二等日發兵往五司楊朝棟造船一百隻要分投出劫思石婺川龍泉等處等因又據永甯參將吳文傑報據赤水衛申稱播酋統兵二十七營各擡舡隻篋索出劫永甯宣撫司雷鳴鎮等處聲言要借路攻打永甯赤水在於白羊坪

劄住又據永甯宣撫司申據守邊頭目王甫松報稱播兵由大紅關等小路各執布撚擁出攻趙渡河後宅大小鹿鄉等處地方隨集羿兵對敵殺死播賊十三人奪獲鞍馬絮被四十餘件又據永甯衛申報探得楊酋領兵屯劄宣撫司石寶寨花毛田等處口稱要打永甯赤水攻打附近敘瀘等處等因十二日又據兵巡上川東道報據偵探營兵報稱綦江縣鄉兵高仕偉糾集鄉勇將播苗殺死三四十人懼其報仇高仕偉逃躲不知去向又南川縣鄧坎村韋文寶糾集鄉勇殺死播苗四五十人原村余早糾集鄉勇殺死播苗五十七人其南川鄧坎桐槽紅篆等寨鄉民

殺牛飲血誓與播苗對敵除查明另報外等因十三日又據貴州分守思仁道呈據守備楊惟中報據偵探官兵報稱楊應龍起集大兵於八月十六日自播州起身由黃平葛彰司到石阡府羅應屯取拏五司七姓本頭楊朝棟領兵由龍泉到思南又目把何從良巡警朱敬等由偏刀水出錫落關抵龍泉聲勢甚是狂大等因十七日又據防守合江遊擊楊敏政報稱探得播兵到於永甯土司地名後山等處盡將地方燒劫捉擄男婦不知其數土司弄兵與賊對敵殺死播賊溺水者約有三四百人卽今播賊越過趙渡河要來攻打石寶等寨聲言徑由箐口衝出合江等

因又據總兵萬釐揭據防守瀘州參將王夢吉報稱偵探播苗造舡百餘每隻可坐百人篋纜無數大如茶鍾等因又據敘馬瀘道報據楊敏政移稱差兵趙仕先探得播目王繼先見在修國置造槍刀要買鐵又造小舡百隻每隻可渡二十餘人岸上堆積舡板數百播州令何提調封刀一把馬一匹盤蓋一副與袁年砍路造舡說要出合江一遭等因二十日又據守東道呈據南川縣申據東鄉村邊勇張仕端等報稱九月初八日被播苗蜂湧圍村燒毀房屋四十餘間擄去男婦人口難以盡記各等奮勇敢殺苗子七人當被搶去後有播目寫招帖叫我等降播如有故

違督領大兵勦殺不饒等因各轉報到職除嚴行各該道將等官督率軍馬相機戰守不時偵探俟再有無聲息另報外合行塘報

咨湖廣備兵

爲軍務事照得征勦播賊事宜業經本部院備將湖省應調集兵馬應買運糧餉與應修製器械并分布戰守各緣由移咨貴院行令布政司會同按察司并辰沅湖北等道作速挑選漢土精兵四萬應用行月二糧就將部議應解蜀省銀一十六萬有零不必解蜀留在楚省充作前項兵糧并請照近日會題應調揚州鎮江等處及本省驍健土

兵徑自差人前去徵調赴楚分布去後今照川貴兵糧大半畢集日費本折糧餉不止數千祇候陝浙雲南等省官兵日前到川相機舉事惟湖省兵糧屢次行催迄今全無音耗該省偏橋鎮遠清浪平溪等處皆係信地川貴兵多將廣一時擁聚重瀘合江平越養龍等處地狹難以棲劄若分布四散應進之地又恐該賊疑畏若有衝突偏鎮一帶將何阻遏軍機所係似難再緩合再移咨爲此合咨貴院煩爲照依節行速催布按二司及該守巡兵備等道將原行應調集漢土軍兵四萬并揚州鎮江等兵不次差人分投催調前來如新設總兵陳璘已奉俞旨想在目下到

任如尙未到且暫另委將官統領分布於鄰播隘路把截
聽令進攻其行月二糧希速行司將應解川銀一十六萬
有零并通省應堪動銀米隨宜解運若盔甲槍刀弓矢銃
礮等件卽今造完各若干件數如未完者必爲嚴立限期
比併速造前項事件准在冬初一一辦足以便約期行事
少有一事未齊難免牽滯三軍日食甚夥早得一日行事
得省一日之費幸勿再緩先將調到軍兵運積糧餉修製
器具各數目希由移送軍門查考

咨湖廣撫院移駐沅州

爲緊急軍務事案查先准兵部咨已經備移貴院希將應

解蜀銀令留楚用若無見在無論通省正項糧銀并應堪支者動支調集精兵四五萬并應買糧餉運於鄰播地方及將揚州鎮江等處營兵徑爲催調去後又經屢次徑行該司道迄今未知前兵調集共有若干糧餉買運若干斯時蜀黔兵糧大有次第惟楚中司道泄泄延緩事事遲備近日又准兵部咨爲敬陳戡播未盡事宜等事本部覆御史涂題內稱平清偏鎮等處乃入黔要害之區雖設總兵而無與於餉且白泥飛練正播門戶本部移文貴院照各邊巡撫移駐防邊事例移駐沅州選將練兵督運糧餉務要兵精糧足聽總督調發舉事等因適與本部院具題意

合業已移咨訖今照本部院卽日移鎮川東督催文武將吏舉事所有楚省兵馬相應一併齊發今准部咨移鎮一節理合再行爲此合咨貴院煩爲作速建牙沅州以速全省兵糧催償其揚州鎮江等兵再煩差人前去守催星馳至楚偏橋等處分布希將移駐日期先行回覆幸勿遲緩

咨貴州徑催雲南兵

爲緊急軍務事本年十月十二日准雲南撫院陳咨開應調赴川應援官兵今只約調漢土官兵六千餘眾戰馬千餘匹應用犒賞衣裝行糧米菜與製造軍火器具等項大約該銀一萬三千二百兩除犒賞與軍火器械共該銀一

千餘兩自行措辦其餘無從處給查有原議助黔抵還川餉銀兩除解過五萬兩外餘二萬七百七十五兩未解只得於此項動支銀一萬二千一百八十兩應給前項此只可起行衣裝及一月行糧之用一到川營便當川省本折二色接濟合咨速行布政司備辦糧草於分布處所聽給其借支解黔前銀卽行川省照數就近解補仍移貴州撫院知照如川省糧糗處給可足卽當再發精兵二千共可一萬之數先由同覆以便發兵等因移咨到部院爲照滇省兵馬原擬調到發貴州防剿今旣發行相應移知備餉除移文雲南撫院卽日起發前來外合行知會徑催爲此

合咨貴院煩請查照差官速赴雲南將前項已整兵馬八千或調足一萬責令該管將官督率徑赴黔省分布俱不必到川往返其入黔到營本折糧餉責成該司道作速預爲備辦聽候兵到於分布處所照例支給幸勿遲誤希將兵到日期咨覆軍門以憑咨部施行

塘報播事

爲塘報夷情事萬歷二十七年九月二十三日據貴州守巡貴甯道呈據永甯衛塘稱播酋楊應龍分兵十八營將宣撫司內宅地方攻打該司目魁王甫松見在點軍把截尙未過河又據赤水衛呈據白撒所申報播酋發兵二二三

十營每營抬舡十隻要借路過前去攻打赤水畢節永甯
及往敘瀘納谿燒糧十月初二日又據敘馬瀘道呈准參
將吳文傑移據永甯宣撫司申報楊應龍預令邊目羅岡
等打造河舡百十餘隻箴纜百十餘條統兵劄在邊界揚
言要打石寶等處近抵永甯又據防守五畝堡指揮王繼
祖報稱探得楊應龍牌差夷目楊總營前來上下赤水令
上赤水夷目袁謨帶信與下赤水夷目袁年叫備下緣腦
包紅絮被在二十八九日要齊又據兵巡下川南道及防
守遊擊楊敏政各呈報相同初六日又據分守川東道報
據播酋差游應朝等八人入境託名進表實探軍情已經

差官押解資陽簡州監候聽處又據萬總鎮報據哨官鄧朝相於綦江地界盤獲播人顏京王先賢楊瓊及隨行辛受王奇七老六人稱係楊應龍差往各衙門投文隨與萬總鎮史參議會議播酋旬日之內兩次差人往來狡詐莫測必有規探隱情發仰巴縣暫羈聽處又據楊敏政呈報九月二十九日據播州下赤水里夷目袁年差通事王朝寵投稱本月二十四日本司遣火牌一面差委到里操點丁山小溪仁懷赤水等里軍士衣甲軍器戰馬聽候親臨調用初八日又據貴州清浪參將劉效節報據興隆衛申稱播目五十餘人身帶長刀徑往九股邀拽苗兵數百入

播將白田堡軍民劫擄一空有哨兵張林田保等奮勇斬獲首級三顆殺傷二十餘人十月十八日又據兵巡下川南道呈准副總兵曹希彬報稱探得上赤水袁頂差人謂袁年至紅巖會話又有一楊委官隨帶有部兵五十不知所行何事一董委官一行十人於九月二十八日往仁懷里去訖又據永甯宣撫司長官陳希儒報稱播酋要於十月初三日親督苗兵數萬由高洞赤水直抵合江欲犯內地二十五日又據下川南道呈准參將吳文傑手本據永甯宣撫司報稱探得播寇統兵三十七營止將三營見劄找巖修固餘俱退劄花苗田又稱楊酋另統苗兵六十營

專要來打合江二十六日又據敘馬廬道呈准副總兵曹希彬都司吳從周移報探得楊酋差官三人帶兵不知其數前來仁懷里與夷目袁年等各要兵一千要犯合江又令各兵把截路口不許放人出入又據敘州府安邊同知李廷謙呈據永甯哨領兵官彭泗報稱探得楊酋統兵三十餘營剗高洞仁懷夾口等處聲言攻打合江一帶又據永甯參將吳文傑申據永甯宣撫司守邊目把王甫松報稱探得播酋差提調蔡丑兒領兵數千抬舡百十餘隻要行暗渡過河是甫松等加兵堵截二十七日又據駐鎮黃平通判王三策呈報探得楊酋自綦江回拒立險關一十

七箇修挖塹坑令楊七楊總管統兵劄住白泥糾拽九股生苗共一百九十八寨出入東坡官道劫擄軍屯人民受害又聚集各寨夷頭大張聲勢將杜橋等寨包擄去訖殺死張大張三二命但黃平城池雖調有官兵恐彼眾我寡難以抵敵十一月初二日又據總兵劉綎呈據防禦南川遊擊王之翰報稱眞州民張廷瑞墨帖飛報楊應龍統兵出關數多不知何往又據縣民楊巨賓楊坤探得楊酋點兵三萬令兵各備乾糧七日竹簽二根又據兵快吳正東楊傑報稱探得楊應龍委於十九日發軍數萬每兵備乾糧七日又在土平甯溪取牛五十隻賞軍及差頭目帶人

五十在黃桑壩起軍其眞州土官鄭葵避住婺川鄭紹德逃往貴州駱齡避豬羊台并百姓攜男帶女搬出南川各處去訖等因各轉報到職除嚴行川貴各該道將等官督率兵馬相機戰守不時偵探俟再有無聲息另報本職仍一面移駐川東重慶地方就近調度外合行塘報

咨催福建廣西解餉貴州

爲播酋外逼貴筑等事近准戶部咨准兵部咨該兵科都給事中張題奉聖旨兵餉著料理實濟急用的去欽此抄出移咨到部查得貴州募兵糧餉節該本部題取雲南銀二十餘萬湖廣銀一十一萬福建銀一十萬廣西銀一十

萬俱嚴行速解貴州軍前支用各該衙門自應如數速解
共濟艱危况福建廣西銀兩皆係見在實數科臣張條議
前因相應再行嚴催合候命下移咨福建廣西各巡撫督
催該布政司將庫貯銀兩差官如數星夜解赴貴州交割
卽有不敷必須多方湊辦如若推諉稽延致誤軍機聽貴
州撫按指名題叅重治仍咨四川督撫知會等因題奉聖
旨是這銀兩著便行與各撫按嚴催解赴貴州應用不許
推諉稽延致誤軍機欽此移咨到部院案查先准戶部咨
開福建廣西湖廣雲南各省協濟貴州前項銀兩隨經移
文貴州撫院差人徑赴請發去後在湖廣雲南俱已解給

貴州惟

福建廣西

前銀候久未見解發今准戶部咨查前餉合

行差人請發爲此合咨貴院煩請軫念貴州兵馬畢集勦
播在邇卽速檄行該布政司查照本部節次題請奉旨嚴
催事理將庫貯銀兩湊支十萬兩差官管解貴州軍前交
割以濟燃眉仍責令差官星馳前去勿得在途耽延有誤
軍機希將起發日期見示以憑咨部此係數萬兵馬竝待
需用緊急軍務一有脫巾之呼彼此俱屬不便料貴院體
國恤鄰之心當必有倍萬恆情者幸勿遲緩

咨湖廣再備糧餉

爲緊急軍務事近准貴院咨稱楚省已調漢土官兵四五

萬合用本色糧餉已有三萬石俱運偏橋等處聽支等因
准此爲照興師征討期已逼迫今川貴應運糧餉頗有次
緒第楚中僅止寶糧三萬石若以一兵日給一升止足前
兵五六十日支用將來師期旣難底止不免有庚癸之呼
查得湖北一帶應徵大糧設若比照川省改徵本色運赴
軍前及將各州縣見貯在倉稻穀亦行碾米通爲運赴似
得濟其急用未知貴院會否有行爲此合咨貴院煩爲轉
行該布政司並湖北守巡等道將湖北一帶應納大糧改
徵本色徑運偏橋等處聽支或再將各州縣在倉稻穀急
令碾米畢集此中須足四五萬兵數月食用庶兵食兩足

得免脫巾之虞此係三軍急需首務幸勿遲緩希將發運實數回覆查考

再咨湖廣催軍餉等項

爲緊急軍務事近准貴院咨准本部院咨督行湖廣布政司呈議偏橋等處征播官兵應用三萬日支糧餉移行辰常等府查備并於司庫動銀買米一萬共約三萬有奇委官運貯以待需用餘少米石陸續湊買軍火器具見在查處等因備咨到本部院履行移將該省兵馬四五萬足支數月餉米作速買備及查議湖北一帶大糧改徵本色或將各府州縣倉穀碾米再運軍前并調漢土官兵與合用

乾糧炒米烘炒魚鹽薑蒜及將軍火器具另開一單查酌製造務足數萬軍兵支用去後未知司道曾否局承料理今照師期逼近川貴諸務盡備只俟楚中兵餉器械實音一至卽行分布茲東南兩路雲集兵馬每地幾萬無處屯劄欲進爲難應合再咨爲此合咨貴院煩請查照先今咨內事理希再差官前往保靖麻陽鎮筸鎮溪等土司并近調永順各將前擬并本部院添調精兵務足四萬責令各土官統領馳赴沅州聽監軍胡魏二道分布至於見貯餉米三萬卽行督餉道責成分運各官火速催運沅州收候轉運營中聽支其前發單開軍火器具等件見有者希爲

發去無者晝夜打造不足糧餉與乾糧等項折色軍需必
在今冬各備完起運聽支此係萬分緊急三省約會舉事
軍機所關幸勿遲緩仍將各項兵餉器具齊足數目陸續
咨覆查考

咨湖貴整備兵糧聽候舉事

爲軍務事照得

蜀省川貴

兵糧久已盈集師期計在目前所有

分布機宜亟應計定庶便責成今

楚黔中

先後徵調漢土官

兵運貯本折糧餉修製軍火器具各該司道經承半載月
日已久諒必備具第入播道路歧徑甚多未知貴院酌以
路分幾路兵分幾枝領兵偏裨將領等官作何統督均當

預定妥確以一戰守爲此合咨貴院煩查征播進兵道路
總共若干漢土官兵分爲幾路進攻某路應用某處兵馬
若干委何將官統領某兵強勁當爲先鋒某兵稍次當爲
殿後某爲左右應援某爲登高遠峭强者定爲衝鋒稍次
者定爲後應弱者留爲守城作速責成道鎮分布明悉只
候約期舉事再照師行糧從軍中急務楚黔省糧餉卽今運
積者見委何官監收貯在何處地方若轉運營中夫役或
派於里甲丁糧或動銀招募民間與原行預備乾糧烘炒
炒米魚鹽薑蒜之類斯時各已買備若干均希一一細開
同覆此係三省立待約會大舉齊進事理幸勿再緩

咨固原甯夏榆林買弓箭

爲軍務事照得征討播逆師期逼近所有軍前急需軍火器具蜀中雖委官無分晝宵監造尙多未就近據總參等官面稟臨敵長技惟弓矢爲最而弓矢強勁在陝中爲良只有甯夏甘肅固原三鎮弓矢健利足堪戰陣隨行布政司會同監軍道議得甯夏上號弓五百張每張價銀六錢共該銀三百兩上號箭二萬枝每枝連鐵頭價銀三分該銀六百兩甘肅上號弓五百張每張價銀七錢共該銀三百五十兩上號箭二萬枝每枝連鐵頭三分共銀六百兩固原上號弓五百張每張價銀七錢共該銀三百五十兩

上號箭二萬枝每枝連鐵頭三分共銀六百兩應動官銀
委官領解前去收買隨買隨解不必候齊等因前來批行
依議去後爲照前項弓矢司道所議雖經差官買解第酌
定價值之低昂辯驗弓矢之真贋似難取憑必須仰藉貴
院委官協同代買庶克有濟亦免愆期又查軍士用箭或
止中號未必用上號之價亦須貴院酌定價值貨物相當
乃無浮冒爲此合咨貴院煩請查照定委文職或武職官
員同差來委官將解來前銀代爲收買上號弓五百張上
號箭連鐵頭二萬枝若價有賸餘通儘收買若價值稍增
隨便酌處倘彼中倉卒無見賣者請將該局并營伍中見

有者留其價值照數發來以濟急用幸勿遲緩希將收買數目見示查考

谷湖廣防犯

爲緊急軍務事照得川中征播兵糧業已畢集惟楚中事

黔

中事

體尙未大備深爲可憂乃逆賊自知天討必加聲兵四出不日暗攻南川則曰要犯重慶形迹大彰勢必一逞本部院卽目建牙重慶誓師將先懸賞後進攻倘或逆賊知其必死先發制人拌命衝突在川中兵馬足當一面之寄在烏江等處亟宜多方布置以遏其鋒偏橋等處兵馬糧餉尙無信音將何堵截萬一乘虛長驅致誤事機咎將誰諉

合再申飭用保無虞爲此合咨貴院煩請督行監軍二道
卽日移駐偏橋鎮遠一帶會同辰沅兵備道督同參備王
之臣等一面將先調鎮筸沅靖鎮溪等處官兵二萬分撥
隘路整擗以待一面將續調麻陽浦黔新化永順等處土
兵二萬作速差官分投催儼前來合營分布聽令賊如不
動則已如或衝突則併力夾攻務使斂迹歸巢毋容滋蔓
爲害一面速備乾糧烘炒諸物俟本部院約期進兵共成
大舉幸勿違誤

咨貴州防犯

爲緊急軍務事照得川中云云同前爲此合咨貴院煩請

督行漢土領兵將領等官速將所部兵馬及軍火器械衣甲等項整頓停當分發隘路劄營時刻加謹防守差人偵探賊如不來則蓄精養銳以防衝突賊一入犯則併力擒斬以挫其鋒務須進止慎重毋爲狡賊深誘仍嚴行速備乾糧烘炒等項聽候令到進攻諸凡緊要機宜諒貴院自有石畫毋容多贅

咨貴州督勵安疆臣擣巢

爲飛報萬分緊急地方事本月初六日據貴州布政司呈據防禦黃平指揮徐登階稟稱十一月十九日未時探兵李孝夷頭阿保等各報稱播兵數萬由白泥出小大章劄

營又由構皮灘過渡出苦菜坪到白泥劄下又報播苗在
興隆擡頭坡劄三大營八小營今又發探馬來黃平長沖
哨探有大翁鋪軍民驚慌搬移等語查得各報兵情如出
一口且黃平在播巢之中防兵五千眾寡不敵事勢燃眉
伏乞速令安疆臣遣兵由沙溪入播襲後庶興隆黃平之
急少緩同日又據按察司呈據興隆衛東坡堡軍人李萬
等飛報播兵數萬徑出後洞圍殺白田乾溪水口黃眼等
屯燒擄人口房屋卽令糾合容山九股等處叛苗攻打興
偏黃平東坡爛橋又執木刻上寫把總隆諭興隆通衛官
民吾今督兵數萬追尋奸徒馮權張熹何以爵等爾等早

爲發出以免刀兵執迷不發玉石不分等語卽今屯兵離城五里上阻重安下拆偏橋中攻興黃徑通九股以爲大逆請將發兵救援又據監軍道張參議呈報相同各等因到部院據此看得播賊楊應龍不知滅在旦夕尙且聲兵四出爲計愈狡積罪愈深及照水西宣慰司兵精將勇甲播萬倍本部屢有秘計令宣慰安疆臣母子與目把人等就中取事向未見動未審因何觀望若此卽今兵出黃平內必空虛若能率兵數萬暗由沙溪直衝腹心以襲其後賊必首尾不救勢必成擒犁庭掃穴功收此舉合再督勵爲此合咨貴院煩請轉行宣慰安疆臣整兵數萬督同目把

人等親自統率徑由沙溪直進或擣其巢或襲其後則黃平之虞可解虎狼之雄可挫第恐本官觀望不前須藉貴院嚴督之俾知建立幸勿遲緩

再催湖廣官兵

爲緊急地方事本年十二月初十日在貴州撫院咨據都清兵巡道呈據興隆衛申報播兵攻圍東坡聲言攻打興隆黃平衛所又據分守新鎮道呈播賊將東坡等處攻殺合兵劄營於十里橋阻塞偏橋鎮遠音信不通該衛士民慌惚無計乞發湖廣四萬之兵卽日出偏橋夾攻等因到部院看得播賊楊應龍因見川中兵馬畢集自知誅不可

逃乃又糾九股叛苗劫害東坡震及偏橋鎮遠一帶實因湖
省官兵未集糧餉未備狡賊窺知因而乘虛披猖其爲奸
詭深有可虞所據黔省催發援兵應合再行咨催爲此合
咨貴院煩爲查照節行事理轉行該布政司將四萬官兵
日費本折糧餉除前詳呈報糴買并碾運倉儲三萬石一
面移行督餉道運赴相應地方收貯聽候轉運外其不足
之數卽便區處或將湖北倉穀再動碾米或查全楚庫銀
湊發火速買備折色銀兩解赴軍中聽支仍催監軍二道
移駐偏橋鎮遠會同辰沅兵備道將原報調到鎮竿沅靖
鎮溪等處官兵二萬名分撥隘路加謹阻遏俟各兵齊備

卽日三省大舉行事如或播賊仍在偏橋東坡地方聽該道督率將兵相機撲滅仍一面差人將續調麻陽浦黔新化永順等處土兵二萬及近日烏羅長官差人具冊報效土兵二千名分投催儻前去偏鎮一帶劄營聽令併力進攻務要刻期到彼不得仍以空文支吾一應軍火器具衣甲等項造完者作速起解營中分發未造者上緊製造此係播賊攻劫東坡偏橋信地告警軍務文到卽日差官催促分布幸勿再遲

催湖廣官兵同黔兵併力舉事

爲緊急軍務事據貴州監軍道呈稱東坡興隆寶楚黔必

爭必守之衝今播九股苗復屯五里橋睥睨興隆我兵嬰城固守官道何時通坐困何時解意合土兵鵬勦應於東坡通衢劄營拒敵仍乞嚴督湖廣辰沅各道調發楚兵督陳總兵領赴偏橋則三處之兵聯絡策應興隆黃平之勢不孤官道血脈無虞於梗塞矣等因具報到部院案查頃准貴州撫院郭咨稱播夷糾合九股攻劫東坡震動偏鎮軍民慌惚晝夜不安請發湖兵四萬守偏橋一帶以便三省合力進剿等因咨報軍門隨經移咨貴院督行監軍二道及總兵陳璘催發土兵并行布政司查照節行買運本折糧餉與夫軍火器具解發軍前聽支去後今據前因看

得播賊明知川中將兵已集楚中偏橋兵力單弱故爾糾
苗攻劫東坡以及偏鎮不過乘虛入寇計耳今貴州欲斷
苗患議行鵬勦湖省既有信地法當犄角相援乃屢督設
備更無音耗萬一地方有失責將誰歸今據前因合再咨
催爲此合咨貴院煩請查照履行事理差人分投守催原
調各土司土兵四萬名星馳到偏鎮地方分布仍差人催
趙監軍二道及總兵陳璘卽日移駐彼中會同辰沅兵備
道整搦漢土軍兵或貴州官兵併力舉事仍行該司將本
色食米折色銀兩照依節行一一買運適中倉庫收貯聽
支此係萬分緊急不可再遲事理幸勿延緩仍將兵到及

運發過本折糧餉一併咨報軍門查考

咨貴州整兵進剿

爲軍務事准貴院咨報稱烏江河渡二關官兵失事緣由前來隨經移行貴院一面備查殺傷官軍以便查叅一面收斂潰敗殘兵以資戰守去後連報烏江之失乃不戰之過蓋官兵背水結陣其勢在我賊如不來則按兵不動設若一至則併力一擊所謂置之死地而後生也奈何不察虛實誤疑賊兵赴援昧背城之戰乏賈勇之能先自望風逃竄致賊乘勢追擊坐取大敗辱國損威深可痛恨除失事文武已行查究外及照見兔而顧犬未爲晚也亡羊而

補牢未爲遲也方今各路俱已入關直抵白田壩兵將號
勇糧草雲屯滅此小醜勢如拉朽所據該路兵馬雖有此
失自當逢凶化吉因敗致功不宜灰心致沮士氣及湖廣
總兵官陳璘卽日起程移駐彼中會同辰沅兵備道將原
調各該漢土軍兵加意整擷會同貴州各哨官兵併力相
機舉事一面速行該司將坐派本色食米及折色銀兩照
依本部院節行事理一一速行收買選委能官督夫運赴
適中倉庫如法收貯聽候接支毋致臨期缺誤此係萬分
緊急軍情幸勿視爲泛常遲緩仍將各該兵士開列花名
及到信地日期與催運過本折糧餉數目希咨回報軍門

以憑稽考統勿延緩

申飭湖貴加謹防護興偏地方

爲萬分緊急地方事本年十二月十六日據貴州左監軍道按察使楊賓秋呈蒙巡按貴州御史宋批據防禦黃平清浪參將劉效節呈稱十一月二十七日據上塘堡哨探屯老周喬兒報稱二十五日有鮮底野洞高坡各寨叛苗於破塘寨馬場剝牛講話點集兵馬說播州發大兵已到四牌淮在初二三來打黃平興隆偏橋地方劄營拒截官兵免入其內連日各寨建立大國伺候進兵又據土舍羅承德稟稱草場有一人先被播兵擄去今隨播州郭總鎮

來四牌點兵逃出說四牌已將攻城器具齊備初間隹來
會九股并鮮底等寨攻打城池等情請乞添兵固守庶免
臨時緩不濟事等因蒙批事已危急監軍道速議行蒙此
該本道移會思石下路右監軍道張參議并童總兵查行
外合先呈報等因到部院看得播賊楊應龍自知天討難
追整點兵馬拚死衝突勢所必至故本部院不次申飭正
防此舉今觀欲犯黃平興隆偏橋地方不過明欺彼中兵
力單弱斷然一逞所據戰守二端在今日不可不奮力堵
截共保無虞爲此合咨貴院煩請卽行二監軍并辰沅兵
備等道及總兵陳璘各駐劄偏橋新鎮思石等道及總兵

童元鎮各駐劄興隆黃平嚴謹關隘防守城池整擐兵馬
多方哨探賊如不來則常川操練蓄銳以待設或入犯二
省官兵毋分爾我左右前後必須夾攻彼此遠近務要應
援期於功收一戰計出萬全如或逗遛不前致誤軍機者
責有所歸此係賊勢萬分緊急事理慎勿遲延

咨覆湖廣

爲軍務事近准湖廣撫院支咨准本部咨差委雙流縣知
縣鄧宏烈調取施南忠峒散毛塘崖等土司土兵前來彭
武一帶分布等因該本部檄行守巡上荆南道將施南等
兵挑選七千餘名行委廣東參將王一桂統領俱由巴東

至夔府赴涪州屯劄聽令等因移咨到部院案查節據貴州監軍各道呈報偏橋鎮遠一帶屯堡被賊燒劫見在興隆東坡等處屯營未退阻絕三省運道思石一帶地方兵力寡弱不能爲犄角之勢以聲援偏橋興隆之危已將前項施南等兵牌行領兵知縣鄧宏烈等遵照隨據本官呈准施州衛開稱官兵行糧則例議詳列款前來業經本部院酌定以指揮一員川例日支銀九分准加倍支一錢八分千百戶每員川例日支六分准加倍支一錢二分宣撫每員每日照川例准支二錢四分安撫每員川例日支二錢應襲舍人每名日支六分頭目舍把武生親舍每名日

支五分提調旗甲書算班頭押陣官醫生軍伴門皂吹鼓大小頭目銃手家兵伴當軍牢各色匠役殺手等項及土兵姑照川例坐糧每名日支二分四釐其衣糧安家之類川中從來無此例但該衛土兵比之本省頗遠姑每名量給銀五錢以示寬恤之意俱經備行夔州府動支差官解交知縣鄧宏烈眼同各土官鑒鑿散給各官兵收領令其馳赴思南府駐劄聽令分布外今准前因合行回覆爲此合咨貴院煩爲查照作速差官催償各兵兼程徑赴思石聽貴州監軍道分布其湖省行糧不必重支若已支給仍照數扣同以免混冒幸勿遲緩仍希回覆查考

咨湖廣支銀協濟貴州

爲夷氛甚惡天討宜彰懇乞急發餉銀以佐軍餉等事本年十一月二十三日准戶部咨該本部院并湖廣兩院各會題前事該本部院看得播酋肆逆楚屬貴筑勢相唇齒震鄰剝膚禍漸延蔓屯師集餉俱應豫待今該督撫諸臣并議上請不分彼已深得同舟之誼顧蜀欲五十萬楚欲三十萬貴欲三十萬總計一百一十萬除兵部該三十三萬聽徑發外本部該七十七萬除四川於湖廣取銀一十七萬陝西十三萬共三十萬貴州於雲南二十三萬止實解過七萬餘兩湖廣一十一萬廣西福建各十萬共三十

八萬催督軍前支用外數尙不敷目今太倉懸罄動支爲難各省空虛挪借尤難反覆思維計無從出惟是照依東征事例地畝加派以濟一時除貴州地里礮礮委難徵求查湖廣通省稅糧每石加派一錢二分每歲可得銀二十六萬二百二十三兩零四川通省稅糧每石加派一錢二分每歲可得銀一十二萬三千四百二十五兩零行令有司於條鞭之外徵輸以佐時急再照加派所入楚得其全蜀得其半貴處其不足然貴之所難兵俱新增餉無宿儲需銀實切則酌盈濟虛相應不分畛域通融支用况總督兼制三省調度兵食自有權衡總之期於戡難不爲厲民

等因覆奉聖旨是兵興餉急這四川湖廣地畝加派准權
宜行著總督於三省通融支用仍禁有司豪右巧避貪漁
等弊毋致累害窮民兵罷之日卽行具奏減免欽此備咨
前來已經通行三省欽遵去後爲照播賊猖亂流毒三藩
調兵合勦業有成命惟是賊勢眾大歧路甚多故用兵不
得不多而糧餉不得不裕也奈何黔省窮荒特甚儲蓄絕
無及至乞諸鄰省又不克濟以此該部不得已而有加派
之請議令三省通融支用無非同舟共濟之誼目今進兵
在邇師貴宿飽未有驅枵腹以赴敵者本院旣奉有明命
義難坐視及查川費用兵各近十萬湖廣止四萬所據二

省前項加派銀兩相應酌以進兵之多寡爲用銀之等則從公分析通融支用共濟時難爲此除行四川布政司動銀五萬解發貴州協濟外合咨貴院煩爲轉行布政司暫於庫貯別項銀內借支十萬兩火速解發貴州協濟聽支一面行屬徵派內將十萬補庫其餘一十六萬有零聽該省軍前支用此係立等待用事理幸勿遲誤仍希將支發過緣由報查

咨兩省約期進兵

爲軍務事照得播賊楊應龍兇同梟獍狠逾豺狼拒敵王師三省盡爲塗炭殺戮將領萬姓悉被虔虐劉惡極滔天罪

已淪於不道孽盈彌地犯豈止於無將城野難堪人神共憤效尤可懼王法不原本部院奉命總督職在專征旦朝廷斷以征勦爲期則主將當以蕩平自誓卽今糧草處處霧集兵馬在在雲騰加之文武同心中外僇力旣眾議已僉同應整師而問罪合就約會共伸大舉爲此合咨貴院煩請移駐近播地方獎率貴省文武將吏漢土官兵的於二月十二日各照分定道路同日並進開刀勦殺至十八日各抵播州師期已定各宜奮勇據忠布昭聖武犁庭掃穴謀慮務出於萬全震疊天威戡定期收於一戰永清三省之妖氛共洩四海之憤恨用命衝鋒直前奏績者賞格

具在斷不食言違命逗遛畏縮罔功及不依期進兵策應因而失誤軍機者賜劔森嚴決不姑貸希速通行遵照仍乞具覆報查

咨湖廣催兵運餉

爲緊急軍務事照得湖廣偏橋征播官兵與本折糧餉節經本部院督催半年司道視爲緩務迄今無一就緒以致該賊乘虛燒殺偏橋屯堡東坡居民卽今出沒無常情形殊不可測在四川貴州將兵業已雲集本部院去歲建牙重慶分布調停親征定擬師期約會併力進剿祇因偏鎮一帶無兵無餉有礙二省舉事數十萬兵馬坐食等候誤

事甚非渺小其糧餉一節先該戶部題允存留漕糧以濟三省軍中之用近接邸報倉場總督趙一本事關國計等事奉聖旨這本說湖廣漕糧係干京都軍需不宜奏留爲川貴用兵之費著送揭戶部覆議來看欽此爲照此項漕糧旣奉覆看必不能濟惟是節次行催買運并倉儲碾米湖北秋糧改徵本色乃原行專責措辦之事該司亟應運發以濟燃眉之急若再遲延大事去矣三省安危所係合再差人守催爲此合咨貴院煩請軫念川貴兵馬等候速將原調各土司土兵四萬名注意查催未到者差人分投前去守催星夜齊到偏橋一帶分布仍須人人驍勇堪充

克敵嚴責監軍二道起發原造衣甲器具火器火藥解給
總鎮及領兵等官散給戰兵以便對壘其本色糧米速催
布政司並督餉道將買完并倉穀造米共三萬石委官督
夫運至偏鎮相應地方收貯轉運營中支給其該司近報
長衡荆岳辰常靖等七府倉穀作速行令磨米解運仍再
設處多方羅買務足四萬官兵一年之需脫有違誤責在
該司其折色銀兩與烘炒炒米薑鹽等項俱照原行製造
起運勿得再遲有誤事機卽目春雨水泛不便進攻耗費
官儲干係重大希將兵餉到營的確數目備咨軍門幸勿
再遲

發銀思南糴米

爲軍務事照得播賊流毒三藩興師征剿一路由龍泉進攻已將施南平茶等司土兵并建越等兵共計一萬三千五百員名行委參將王一桂坐營孔繼祖等統領前赴貴州思婺防禦并聽令進剿去後爲照此役係奉明旨合兵共伐事屬三省非一四川事也是兵從黔進糧當黔備不問可知但該省屢稱錢糧詘乏措處爲難若再責之預備恐致誤事所據三箇月本折相應通令川省出辦除已預支一月折色外合再買備二月本色以便兼支及查每兵日給食米一升共計該米八千一百石每石價銀五錢共

該銀四千五十兩合行就近平糶庶免搬運之勞除行重慶府動支銀四千五十兩差官管押前來外爲此合咨貴院煩爲轉行分守思仁道卽將解到前銀轉發思南府責成掌印官照數分發行戶收買乾圓好米八千一百石或運婺川或運龍泉悉聽該道督同該府轉運軍前聽委官隨營支放其各兵到彼每兵卽各先給米一升以作上月本色至近日領過預支糧銀每名多銀七釐准作下月折色餘聽另行解發只此三月支盡以後若有不足則聽該省備辦幸勿違誤

咨湖貴分解漕糧接支

爲楚滇助餉勢難如期懇乞聖明下部別處以濟軍興事
萬曆二十八年二月十二日准戶部咨該貴州巡撫都御
史郭井巡按御史宋具題本部覆議取滇楚二省銀又取
福建廣西銀及稱近該科臣李條陳本部覆請留湖廣二
十七年分應該解京漕糧三十七萬餘石亦聽總督派撥
三省通融支用去訖等因奉聖旨是欽此移咨到本部院
准此案照湖省解京漕糧三十七萬餘石先該都給事中
李奏抵三省軍餉續該倉場總督趙題稱不宜奏留下部
覆議今閱部文內云聽撥三省通融支用是此項漕糧仍
充三省軍餉矣及照八路進兵蜀當其四黔當其三楚當

其一前項漕糧卽當以用兵之多寡爲分派之等則但偏橋迤西一帶旣屬楚中節制則龍泉一路兵糧應在彼中聽支相應均分以濟急用爲此合咨貴院煩將前糧三十萬每省各分一十二萬餘贖一萬餘石存貯候支內該省者運至偏橋龍泉貴省者聽運貴州川省者幸差官管押從水路挽運四川至重慶轉發營中各聽支用舡隻行令所司上緊刷撥或動支官銀雇募務在三月以裏到重慶此係大軍張口待哺事理幸勿遲緩先將起發數目日期咨報查考

咨覆湖廣進兵

爲請議進兵事准湖廣撫院支咨仰乞裁定令湖貴三總兵各以全力獨當一路專督兵將相機進剿庶見委任責成之意等因到部院爲照貴院議以偏橋迤西思石龍婺則屬總兵陳璘興隆黃平則屬總兵李應祥烏江養龍則屬總兵童元鎮各專一路分布甚當但查圖本興隆偏橋龍泉三處各係一路直抵播州祇緣興隆偏橋兩兵初入白泥之地路經四牌此中助暴生苗盤據作梗必須兩兵先將悍苗合力剿盡掃清運道然後分道而進至播方得會哨非謂沿途一路而偕往也及查龍泉一路兵止二萬用副總兵陳良玘督之亦足堪任所據陳璘李應祥仍聽

會同了此四牌之苗方行分路爲便矧官兵業已進營旣難中制亦難遙度應聽二將便宜計議行事不宜臨敵更易庶免掣肘之虞爲此合咨貴院煩請查照仍移文總兵陳璘遵照施行

行查烏江河渡失事

爲緊急軍情事准貴州撫院郭咨據左監軍道呈據河渡統兵都司張秉忠報稱本年三月十四日夜擒獲奸細搜出公文知賊衝營十五日未時播賊突出此時雲南沅江甯州羅平等兵迎敵賊遁詎料無援兵眾淹溺督陣官何天慶名色把總甘靖等四名哨長許應援砍賊數人中槍

而死餘各陣亡領兵指揮胡珠王之瑞馬時亨督陣贊畫黃龔千戶龔勳劉應祖百戶邵先業把總周貴安時泰冒陣而出其餘死傷官兵查明另報又准咨據總兵童元鎮手本據原任參將楊顯稟稱三月十六日午時據永順官兵出哨至雅水偶遇安兵約會盟誓共圖攻取各有旗號目把質當意在十八日起營道鎮疑慮詭謀亟傳令間適據霸陽守備陳雲龍報賊兵不計其數前來衝突官兵連對三陣第四陣賊兵益多所執旗號卽昨會哨質當旗幟永順中哨驚亂不能禁止霸陽兵相繼奔渡浮橋一人走過砍斷橋纜隊兵俱各浮水不能水者淹沒守備陳雲龍

等不知下落殺傷官兵候查明另報等因咨報到部院爲
照烏江河渡二處旣得斬關而入自宜堅壁據守以待諸
路官兵進關然後併力長驅方爲上策乃始而奸細之供
報則不作隄防繼而狡賊之詭謀則不知覺察且扼險不
能固守據橋莫之把截此皆在事各官玩於鄰之震忽也
方今各路俱已入關直抵白田兵精糧足滅此小醜勢如
拉朽所據該路兵馬雖有此失自當因敗爲功不宜灰心
致沮士氣合咨貴院煩行監軍道鎮獎率兵馬收集殘卒
多方鼓舞加意撫綏如雲南泗城霸陽永順等兵應添補
者就便添補應另調者火速另調一留省城彈壓一屯烏

江戰守務俾內外備禦威武用張則聲勢聯絡旣可以壯
犄角之勢又足以杜窺伺之奸於時勢弱則保境自完勢
強則捲土直入擒惡擣巢共奏奇績慎勿灰沮未便

調滇兵咨貴州備餉

爲緊急軍務事本年三月二十七日准雲南撫院陳咨稱
本院復又陸續調發精兵五千餘名選委都司張先聲統
領前詣霑益信地分布防禦播賊衝突且以出奇本院於
三月十三日移駐曲靖境上獎率官兵共圖犄角滅賊等
因到部院看得滇省發兵五千移節曲靖應援足見同舟
共濟之誼滅此朝食之懷但貴州烏江一路兵馬單弱需

兵萬分緊急滇院帶行精兵五千見屯霑益去黔不遠與其立幟遙爲屏障不若臨戎共奏偉績亟應起發到黔以援彼中緊急及照沐總鎮屢奉明旨責成帶兵援剿至今杳無音耗應合一併移催等因備將前由已於四月初一日移文差人前往撫院陳處發前兵并促沐總鎮帶兵前來應援外所據滇兵到黔糧餉應合移咨整備爲此合咨貴院煩爲查照速行督餉道將滇兵五千本折糧餉作速計處停妥聽候官兵入境即便接支仍一面差官持令前去督催刻日抵黔協剿勿得遲延頃刻其廣西總兵李如樟選帶土兵亦於是日一咨該省撫院給與行糧應付催

促將兵星馳前來一牌行該鎮速詣近貴地方約會貴院及鎮道併力剿賊如尙未到仍煩就近再催希將各鎮移駐日期各帶兵馬實數咨報軍門查考勿遲

咨湖廣催漕糧折銀解充軍餉

爲楚滇助餉勢難如期等事本年四月初三日准湖廣撫院支咨稱楚省二十七年分留用漕糧除華容江陵等縣因患水災近准部咨止徵正米一萬五千五十七石六斗一升零每石折銀七錢共該銀一萬五百四十兩三錢三分零其餘州縣實止正耗米共二十七萬六千九十石七斗六升三六耗席輕齎銀三萬六千四百八十三兩四錢

二分零楞木銀七百八十八兩八錢三分零以上銀米三省均分每省止該本色漕糧九萬二千三十石二斗五升五合改折漕糧并三六耗楞木等銀各該一萬五千九百三十七兩五錢二分八釐四毫第惟本色米石解運入川時值三峽之水瀰漫難挽合無照數改折責成糧儲道易銀行令湖廣布政司差官解赴川中軍前聽支庶於事省用足等因到部院看得時下正當青黃不接之時米糧騰貴之際誠得本色之助有裨多矣但稱峽水泛漲挽運艱險委屬不便既經貴院酌議明白相應改折庶爲省便爲此合咨前去煩將應解川省漕糧九萬二千三十石二

斗五升五合照江陵等縣事例每石折銀七錢共該銀六萬四千四百二十一兩一錢七分五釐同災傷改折并三六耗尖蓆等銀一萬五千九百三十七兩五錢二分通共八萬零二百五十八兩六錢九分五釐一併行令該省布政司火速差官解川交割以便及時轉發買米運赴軍中接支其貴州糧米羅買甚難仍運本色庶得濟急此係三軍立等待用事理幸勿遲誤

咨覆貴州照批行湖廣助餉

爲地方孤懸等事四月初三日准貴州撫院郭咨據湖廣布政司呈稱播酋肆逆流毒三省湖廣止偏橋一帶備禦

無用多兵其四萬餘兵原爲三省通融調用卽供各兵之
餉亦卽係三省通融支用非專爲楚也統計四萬五千之
兵兼以軍火器械等項非七十萬兩之餉不可先蒙部題
查追舊欠皆係遠年積逋勢難追併遂議留見在漕折各
項總之僅四十萬有奇本司發過餉銀及製造炒米薑鹽
等項共動過銀一十四萬六千餘兩內有五萬餘兩係皆
借支缺餉二十萬餘將何設處查得見有應解正項額派
虞衡段疋馬舡工料銀兩一併題留充餉俟竣事另行處
補蓋湖省用兵本爲黔蜀原屬通融卽同協濟乃貴州又
執三省通用之議而欲分餉解彼如廣西鹽銀尙多再借

二十萬在廣西諒無所靳其貴州請分加派庶免撥發似難拘於分餉而後通融也又稱輕齎枵木等銀共四萬零一百一十八兩動解過九千六百九十餘兩充餉尙存三萬四百二十五兩三錢合聽四川部院酌派動用卽以此項多助貴州在楚民亦所甘心其加派錢糧免分貴州庶楚與黔不致兩誤合行咨請移行湖廣將加派銀兩仍舊起解貴州接濟燃眉至於司議免分貴州恐難依從等因到部院簿查四月十一日據湖廣布政司呈詳前事該本部院批播賊一破偏橋直走清鎮全楚勢且不保今日利害三省共之何謂湖省用兵本爲黔蜀也二省助黔奉有

明旨四川僅派銀十二萬已借十萬給黔湖廣派二十餘萬可以一萬塞責乎如曰該省養兵四萬則四川養兵十五六萬非無事也施州兵以楚兵用之楚帥信地亦四川餉之矣漕糧已屬京餉豈得遂作楚數廣西已餉黔三十萬矣湖廣助黔非十萬不可仰作速解發無致誤事繳已批該司遵照去後今准前因擬合咨覆爲此合咨貴院煩請移行湖廣撫院檄行湖廣布政司查照批詳多方設處務足十萬兩之數火速差官徑解黔省接濟支用施行

破國塘報

爲飛報捷功事萬歷二十八年六月十五日據分守川東

道按察使張悌報稱先奉本部院催督全蜀官兵四路勦
播該監軍參政張棟等贊理監紀推官高折枝等總兵劉
綖馬孔英吳廣等擊破逆酋楊應龍婁山桑木巖門等關
直逼酋入龍巖國外因圍形險峻滾木礮石交雜如雨仰
攻甚難而又將心不齊旬餘未下復奉本部院申嚴尙方
之劍大發懸賞之銀按院移駐重慶就近監臨仍各檄本
道入營輯和諸將歃血盟神刻期平賊該本道馳赴軍前
會盟誓師圍之前後往來策督已於五月初十日圍前攻
毀鐵柱水門二關圍後攻奪三連山賊勢已窘而死守尙
堅且緣圍後可攻之地一爲水西所據而不實攻一爲詐

降詐死所愚而不急攻復奉兩院糾劾誤事之將諭退水
西之師又遣中軍參將余德榮入營亟催時貴州平越湖
廣偏橋等兵亦集圍下該本道與川貴湖廣監軍等七道
會呈本部院詳允各路總兵輪攻圍後於是總兵劉綎同
貴州總兵李應祥移攻圍後與川湖總兵吳廣陳璘間日
輪攻本道與監軍張參政謝參政將後發賞銀二萬兩盡
數懸示鼓勇三軍卽於六月初五日黎明親督進攻劉總
兵下兵將振奮矢石不顧銃礮震天喊聲動地一攻克其
頭關土城再攻克其二關石城賊眾披靡勢如土崩圍前
高推官馬總兵等亦督兵攻打甚急該劉總兵以天晚登

國慮有疏失傳令據關而營抵夜賊降甚眾楊酋大出賞銀刻苗拒戰苗不敢應酋遂失魄三更之後苗奔國前欲殺出逃生酋見諸苗離散中夜徬徨無計得脫投繯自縊次早輪該吳廣陳璘攻打苗盡前奔兵不血刃一擁而上遂入酋宅俘獲逆酋妻子田氏楊朝棟并三男五男八男九男與各妻女弟姪繡女等及各斬級另查的數國前高推官馬總兵等嚴陣堵苗未明大戰同時俱登俘獲宣慰朱承恩土舍馬千駟主謀孫時泰楊華吳應達何廷玉宋堯相宋一變陳大才何玘僞內使己卯戊寅等并各斬級另查的數俱續報外仍有滾溝奔箐賊苗聽各兵初七日

搜捕盡殲黨賊八百年之首固盡成邱墟數萬餘之苗級足築京觀此皆仰仗皇威丕振廟算有赫部院節制維嚴運籌決勝之所制也一切改土爲流拓疆千里善後撤兵嗣卽查議等因又據川東監軍參政張棟報稱自四月十九日圍固以來兇酋骨刻老虎兇苗負固接攻不下情節陸續塘報外續蒙部院深念師老糧乏委文武大吏各一員至營督責間惟龍巖固極天下至險而狡酋設備極天下至周况以必死之寇用必散之財悍苗無知劫於威惠殊爲死守日互爲死傷不可勝紀然賊食日減賊黨日消又無外援時至事起雖孫吳不能易矣五月二十六日八

道五鎮爲會盟以一眾心懸重賞以鼓敵愾前後左右守各有地四面夾攻應各以時前之海龍壩左之原舊腰營處右之板水蓬口俱十里外各爲一營專責一將監紀一官把截林箐隘口以防其逸移劉總兵於後與周副將號綦南營李總兵號平越營而馬總兵率邊兵與西石劄營圍前專備奔衝血戰且計鋒太銳則少疏之令擒於防逸之兵分布一定職欲在前調度而劉總兵張按察使不肯必欲職同行六月初一日天少霽至圍後則初二初三初四日俱雨與各道四總鎮計分攻合攻合攻有因人之力者分攻有欲乘人之功者各以私心又不相下遂爲剖析

多主分攻據陳總兵謂先劉李擬初五日碁南平越初六日永合偏橋如不下初七日則合攻之初五日晴劉李二總兵分左右各占一山五路併進火礮齊舉職擐甲冑與守道余參將麾旗助喊不移時遂得土城第一關賊崩走逆龍手刺三苗不令入我兵乘勝直上又得石城第二關殺聲震聳沸搖山谷時可遂取三關登國矣緣時已至未戰久氣竭遂且罷攻營守而城頭答話乞降者紛紛矣是夜半田一鵬楊朝棟潛出講話黎明則田氏同宅眷二百口已在城樓餘果投出千餘多爲各鎮爭殺之四更後前關喊殺聲震則石砭毛兵馬總兵令倫上井多乘機前奔

者爲大戰屍僵五六里外黎明吳陳兵上攻第三關不見
出敵者乃知賊已前潰遂各進關圍衙院而賊已死蓋是
夜應龍不寢四望國周一無脫處各巷隘把守者俱無有
遂同二妾自縊妾一不死田氏楊朝棟率宅眷百餘口一
同出投爲陳吳所執另置一室取出逆酋屍火始發八道
令奏民彭廷壽周世祿驗的是實各路斬俘報雖未備約
近萬矣一國遂平是役也拮据已易三時而成功未踰四
月兇酋逆黨擒斬殆無子遺如酋子朝棟以棟勝棟酋妻
田氏小田氏朝棟二子酋長女次女三女酋族兆麟世龍
兆龍酋親田一鵬宋承恩馬千駟酋黨何漢良葉喜受馬

忠何廷玉何明孫時泰等尙有未報者黃七則下巖自縊
俘其妻似無多逸者矣又據海龍壩都司趙賢輔監紀同
知史朝貞報擒苗百餘惟左右尙未報至十餘年謀逆狂
逞之寇八百載富强縱肆之家據其兵力謀謨器械衣甲
獨冠西南諸夷卽水西終以不能必取自退今圍於四旬
舉於二日人力不至於此矣此皆宗廟社稷之靈廟堂帷
幄之勝而本部院腐心嘔血發策決機一腔忠義無一刻
不激發於三省道鎮之間九月籌畫無一事不措置於八
路兵食之內而職與將士受成奉命奏此膚功尙多搆貳
延緩之愆至煩再監亦得借以竣事有厚幸矣除擒斬功

級查明另報等因又據川南監軍參政謝詔報稱本月初六日該各鎮道分定永合二路進攻日期本道先日會同四川吳總兵偏橋陳總兵湖廣監軍道議定於是日五鼓分道進攻官兵奮勇登城殺退苗兵直衝賊巢逆酋楊應龍見勢窮蹙在房自縊放火焚燒吳總兵督兵從火燄中奪出酋已氣絕當日生擒酋子楊朝棟妻田氏賊屬楊兆龍楊從龍楊世龍楊勝龍楊國棟楊堪棟田有秋并謀士戴貴彭道總管田一鵬頭目張讓趙士傑其楊應龍身屍卽約會三省鎮道及贊理監紀等官入城喚集奏民彭廷壽等降民羅國明等同酋妻男識認真正是的除裝盛解

驗外等因又據貴州左監軍按察使楊寅秋報稱逆賊楊應龍據囤環攻日久未下僉議併力攻打後囤各路占據無地屯劄職操馭水西將首奪右槽山坡一帶營盤於五月二十八日盡讓官兵六月初二日川貴劉總兵李總兵各先後督兵到囤屯劄初四日三省道鎮畢會共議劉綎李應祥初五日陳璘吳廣於初六日各照期分打劉總兵攻土城門以左李總兵攻土城門以右該職同李總兵將右路分撥三枝以都司徐成領守備童龍等兵奪鳳凰嶺都司張秉忠等兵由左嶺進都司戴守禮等兵由右嶺進泗城龍英等土兵於囤右崖壁截殺副總兵陳寅督獨山

州等兵於前門朝天等關截殺參將蔡兆吉督兵於板閣
蓬水把截初五日五鼓職等會同劉總兵盡地齊攻賊抵
死在於鳳凰嘴拒敵黎明我兵奮呼一湧衝殺賊奔潰退
走土城我兵乘高俯瞰攻賊立腳不住登時攻倒土城一
面拆卸賊拒月城矢石如雨職同總兵在高山搖旗吶喊
督兵前進戰至巳末緣城接梯高招先登各兵用肩頂城
上先登者手挽魚貫而上陳邦揚親斬冠帶管事藍鳳鳴
首級一顆中軍指揮羅萬善親斬何提調男何訓首級一
顆從賊七十五顆賊奔巖突死及銃死不及找級者不計
其數將月城樓同劉總兵卽時放火燒毀賊奔入大城死

敵自午至申披堅出城衝突三次每次我兵用佛郎機百子銃鳥銃等項直對城門齊打賊傷退回天晚兵已疲困該職會同右監軍張參議督兵尤副使再懸犒賞每高招手銀一錢每兵銀五分各兵歡躍齊心就於月城劄守賊兵膽落在城叫喊乞降直至黎明時陳吳二總兵照依分定日期接攻賊倒戈奔潰各路兵一齊登固擁入內城四面縱火賊酋楊應龍將臥房發火同愛妾縊死要將自焚時五路總兵官齊抵賊衙賊妻田氏賊第三男楊以棟妻田氏第五男楊良棟妻田氏第九男楊奇棟賊妾子楊勝棟妻田氏賊長女貞惠次女貞瑞三女貞福楊朝棟妻田

氏長子松壽次子春壽女性福賊首何漢良田一鵬子六老僞內官十名使女十三口家人五名俱同時拏獲五路道將賊屍擡至城樓喚伊妻男五司奏民同驗真的付陳劉二總兵收驗俘獲賊屬眼同點明收置城樓宣慰司印田氏攜帶在身面交陳總兵收執聽解賊男楊朝棟賊弟楊兆龍走出吳總兵見獲在營賊從弟楊兆麟李總兵見獲在營其各該有名賊首原後圍攻破賊奔前門或斬級或生擒俱未漏網宣慰宋承恩已經本哨把總沈雲相拏獲被前路兵搶獲見在除本日生擒斬級俘獲及我兵陣亡輕重傷查明另報等因又據貴州右監軍參議張存意

報稱先該三省八道奉本部院憲檄議得大兵攻圍賊囤一月未破師老財匱靡有究竟申飭各哨輪班攻打約以六月初五日貴州平越河渡哨與四川綦南哨同日協攻至日該本道同督兵尤副使偕左監軍楊按察使會同李總兵親督坐營官李師沆張奇盛等帶領平越河渡精銳衝鋒兵萬餘黎明赴囤後與綦南哨劉總兵左右夾攻綦南兵由左上平越河渡兵由右上賊眾強弩飛矢礮石如雨我兵站立金鳳嘴不敢近前該李總兵提刀陣後嚴禁退縮三道復懸示特賞先登銀四百五十兩各兵死力直衝將第一層土城傾毀十餘丈賊退守第二層石城我兵

乘勝連破將城樓打毀直趨第三層石城與綦南兵並劄城門堅持不退應龍父子披甲領苗連衝三次自辰至未我兵硬力死守薄暮士卒飢困該三道與李總兵計議賊必乘夜突衝一面造飯餉士一面犒給每高招手銀一錢每兵銀五分諭令標下指揮周宗堯曹選把總金世隆劉朝臣分督舉放號火銃礮以防乘夜衝劫三道同李總兵各將領官露坐嚴警至初六日天未明賊眾慌懼多有從國旁間道奔出者三省官兵大眾分路攀緣而上賊黨開門倒戈奔潰如蟻我兵直圍楊應龍住宅遵守前禁不敢徑入宅內官兵中有從宅後掘牆數孔而入者比劉李二

總兵引兵入宅則楊應龍已縊死臥房於亂兵中擡應龍死屍出驗並收其妻田氏母子及隨從侍女二三百人於後城樓上拘候先是又慮賊後攻急必至前遁該李總兵分本哨副總兵陳寅參將蔡兆吉都司莊志傳守備伍萬鍾汪如淵及標下指揮徐登階等各督部兵於前門晝夜攻守初六日早陳寅等率兵登城與各路兵合將飛虎關樓放火燒毀斬獲多級方會兵圍上前後一時收功爲照貴州李總兵督平越河渡二哨會同四川綦南哨攻打圍後其結局雖在初六日三省並進之一晨而摧賊鋒破賊膽以散賊黨則在初五日蜀黔並攻之一舉功次虛實悉

候勘查始定本道不敢妄爲論列惟是數百載西南盤據
不拔之巨寇億萬眾士女鬱結未伸之積讎又三省七路
兵糧不貲之勞費往以頻年圖之而不足者今以四月克
之而有餘皆仗本部院矢心討賊一意主持開誠布公宣
揚朝廷威信凡文武將吏莫不仰承石畫奏此蕩平良非
偶然之故矣今將前項進取緣由并斬獲功級差官星夜
馳報等因又據湖廣左監軍按察使胡桂芳右監軍參議
魏養蒙報稱本月初五日輪該綦南平越二哨攻海龍囤
總兵劉綎先登將土城并第二層石城打破李應祥繼之
陳吳二總兵亦同助陣拆牆上城賊勢大敗初六日輪該

永合偏橋二哨攻圍總兵陳璘吳廣督率官兵從第三層城左右蟻附而上劉李二總兵繼進當擒首惡何漢良賊見官兵入城皆倒戈投降遂圍楊酋住屋將田氏楊朝棟楊兆龍并其妻女及楊酋第五子俱擒獲楊應龍已經自盡放火燒屍當救火取出審五司奏民與田氏等俱稱委係真正逆酋屍首除職等卽會同川貴各道查明另報等因又據總兵劉綎報稱四月十八日逼酋入圍分兵攻打本職居圍前窮崖峭壁天險莫登惟圍後一線之路稍可進兵緣係吳總鎮陳總鎮所分信地攻打五旬堅守不下乃蒙軍門院道會議將職改攻後路遵奉於六月初一日

親率家丁與挑選精銳勇敢官兵八千移營向後又值大雨如注連日不休至初四日稍霽比夕各該鎮議欲同攻本職恐各人心不齊自誓惟乞一路專攻如亦不效甘任其咎當該二道懸賞衝鋒各兵本職於初五日分布官兵四路攻打將士奮勇一鼓而登連克重城賊眾披靡死相枕藉應龍勢窮力竭本夜自縊身死朝棟以棟惟棟田一鵬等奔投職部周以德營爲吳總鎮統兵攔截打傷千總熊俊奪獲見存本職但期滅賊以報九重而謝人言敢復覲功獨歸一己况原節奉本部院憲牌各路敵血同盟各出精銳更番攻取得賊之後勿問出自何人大家論功若

致債事逸賊且當連坐昭然在案今幸蕩平是本職之功
卽吳鎮之功也又何計哉况衝鋒血戰奪險破城七路三
軍耳目難掩是又不待辯者在今將所獲有名首惡楊明
田飛鵬張玉周五巴內使夏元王守忠壽元慶元慶壽祿
壽庚辰辛巳及各斬獲苗級一千六百二十九顆解赴贊
理監紀史同知查驗解道轉詳等因又據總兵馬孔英報
稱本月初六日本職會同各道并監紀高推官預行將領
土司等官李經等各照原分信地劄立排柵分布擺列本
職仍與高推官親身提兵晝夜攻圍申飭萬分加謹於本
日五更時令各兵奮勇齊力攻打擁兵上進賊兵大敗我

兵乘勝戰奪二層飛虎關嚴諭舉火燒毀我兵愈加精強
先登賊之大囤舉火延燒酋房各賊慌亂四出惟惡苗死
戰本職提調所屬精兵併力合圍鏖戰百陣砍殺多酋眾
議前鋒不許割級仍令多兵遇有通賊處所加兵拒堵埽
蕩殘酋斬無對敵賊苗方准割首本職此時雖卽上囤傳
令所部漢土官兵不許一軍進應龍衙宇並不許夾帶一
物其應龍見得前門兵已上囤遂自縊死應龍妻子卽領
闔家人口盡從後門逃生方將囤門一開後兵方擁而入
隨將應龍衙舍府庫合兵圍之其南川軍兵毫無相干此
各道監紀眾目所視者况本職先已申飭不啻再三續據

參將李經等各報稱共斬獲苗級一千五百餘顆生擒宣慰宋承恩賊黨孫時泰楊華吳應遠何廷玉宋堯相宋一變陳大才何玘馬千駟等二十餘人又內府己卯戊寅等因又據總兵吳廣報稱本月初四日各鎮道會議分定期攻打後囤初六日係本職與偏橋陳總兵進攻該本職於初五日移會監軍道謝參政贊理監紀蔡知府趙州同取發衝鋒銀三千兩獎率三軍初六日黎明督發都司趙應科等奮勇登梯破城直衝楊應龍宅內父子併力拒敵酋見兵勇縊頸放火自焚本職親陷烈燄中擒出酋已氣絕生擒楊朝棟田氏田一鵬等各營擒斬俘獲無算此豈

本職奮不顧身之功實皆仰仗部院之神謨監軍之指畫
諸司道之協謀監紀之贊襄及在事文武諸臣之效力故
能使元兇就戮固穴蕩平上紓宵旰之憂下慰羣黎之望
除將楊應龍身首及生擒賊首卽行解報其斬獲賊級俘
獲賊屬器仗及有功員役陣亡輕重傷官兵查明另報等
因又據總兵李應祥報稱本月初五日辰時督率各兵攻
倒土城已經馳報外至巳時分又該二道鎮懸賞各兵奮
勇爭先將月城石牆攻破賊兵披靡奔潰墜巖死者不
計其數初五初六二日共斬獲功級四百七十八顆其陣
亡陣傷官兵查實另報等因又據總兵陳璘報稱本年六

月初四日該川湖貴州各道鎮會分攻國日期劉李二總兵初五日本職與吳總兵初六日至期劉李從國後右邊進擊本職與吳總兵自左邊攻打自辰至午攻破賊城兩層本職密令副總兵陳良珝等從中於初六日早銜枚前進各從山坡懸上擒殺把守城固老虎軍豎立兩鎮旗幟舉礮爲號劉李二總兵相繼齊進各賊驚惶奔潰官兵擁入直薄酋巢楊應龍自知不免當卽自盡生擒伊妻田氏男楊朝棟以棟良棟奇棟勝棟并朝棟幼男松壽春壽及奏內有名黨惡何漢良等就據田氏於懷中取出該司宣慰司銅印一顆當同監軍道驗收轉解川貴監軍各道審

驗應龍全屍候解外其擒斬功次除查實另報外各等因
塘報到部院案照本年六月初九日據分守川東道按察
使張悌及三省監軍參政張棟等報稱總兵劉綎李應祥
吳廣陳璘馬孔英等各督官兵於初六日攻破海龍固逼
賊自盡及生擒賊子楊朝棟等捷報到本部院緣事體重
大關係廟堂懸念欲候報齊恐致耽延已撮其大槩當於
本月十二日具本題知去後今據前因則逆賊自盡全屍
見在已經眾驗的實逆賊妻妾子女及同逆惡黨已經生
擒殆盡逆賊糾刻生苗所稱老虎兵者聚而殲之幾無遺
種且參伍諸報則諸將先登後繼大小功次已可得其大

凡卽今播已盡平兵已漸撤改土爲流已漸有成議除候查明功級通將三省八路各文武功罪覈實及善後事宜另議具題外合行塘報

撤各省官兵回咨

爲仰仗天威破圍滅賊飛報捷音事萬曆二十八年六月初九日據八路監軍總鎮等官報稱官兵自興師以來殺賊大敗追逼上國四面環攻於六月初五日奮勇攻破圍國甚急逆酋自覺不保是夜縊死初六日官兵一湧齊進獲其屍首生擒賊妻田氏賊子楊朝棟等妻妾子女繡女及內監軍師頭目并斬級萬餘卽今賊巢一空我兵盡劄

國上十年狂寇一朝蕩平等因到部院除先行捷報外案
照先准貴院咨送將官某統領官兵到部院已經發營分
布進剿去後今據前因看得播酋楊應龍滋逞淫威甘爲
叛逆破城站已三五處殺官軍至幾萬人以至震驚西南
搖動海內彼恃此國險絕以爲人迹必不可至也乃今萬
人同心三軍用命兩日之內連克三城盡破險國因而元
兇自盡逆黨就擒闔國惡苗盡膏霜刃削株擷根靡有孑
遺從此四封千里盡入皇圖尺地一民盡歸王化三省永
無狗吠雞鳴之警四海逆折憑山嘯澤之奸本部院待罪
地方殊爲多幸此皆仰仗貴院天心滅賊唱義勤王投袂

興師推轂遣將以故天威所加易如拉朽非偶然而已也
除將各官兵擒斬功次應紀應賞與夫陣亡優恤等項通
候查明敘錄具題及照例支給行糧外合先發伍爲此合
咨貴院煩爲查照施行

回覆楚省

爲楚滇助餉勢難如期等事案查先爲前事准貴院咨差
中軍把總李正寶領解銀三萬兩前來已發重慶府秤收
貯庫聽支出給庫收付差官回銷外今照播賊幸已蕩平
原調各省官兵亦經盡數撤發其議留三省官兵糧餉各
省本折亦足支用所據楚省未解漕糧相應停止爲此合

咨貴院煩爲檄行布政司并督糧道將未解川省漕糧扣算或聽該省別用或仍解赴部接濟支用施行

咨賑民夷

爲軍務事照得

貴州黃平東坡龍泉湖廣偏橋鎮遠

等處地方各與播州

接壤年來楊酋猖狂毒流各處軍屯民夷或父母兄弟被其殺虜或妻妾子女被其虔劉受毒旣深幾無噍類近日逆酋旣以伏誅黨類一鼓平定地方怨忿雖以少伸而廬室空虛何以爲生相應亟爲賑恤以慰眾懷爲此除川中四路業已舉行外合咨貴院煩爲轉行該道選委能官將前項被害民夷之家盡數查出大約以餉米一萬石爲率

每戶量給三斗以示賑恤之意事完將支過餉米數目及賑恤過軍屯民夷姓名造冊希由見示以憑會題施行仍行令承委官員務要審實的確毋容吏書作弊低昂以致窮民不霑實惠

查議善後

爲集議建置善後事宜以圖久安長治事該本部院會同貴州撫院郭偏沅撫院江照得播賊猖亂興師征剿三省之兇殘雖已蕩平而百世之建置所當慎重蓋緣該司五十四里則夷漢雜居所屬八司則幅輳廣遠沃野千里壤接三藩圍於腹裏之間要非諸土夷可比也乃逆賊父子

大逆無將自取誅戮近准兵部咨該本部題覆首惡旣已
怙終六師斷難少貸誅其人而磔其肉削其土而改爲流
先旣奉有嚴旨今更誓有師期三省戮力一鼓蕩平俾螳
臂不得以怒輟螢火弗致於大燃此朝野之同情督撫之
責任而地方之至願也題奉欽依備咨前來允宜遵行以
示更新之治以洗汚俗之風但事關創始法貴僉同合就
通行查議爲此移咨貴院煩爲速行監軍總鎮及贊理監
紀等官齊集營中從長計議要見播州宣慰司原係土司
衙門今逆賊不法伏誅所議改土爲流相應作何建置或
建立郡邑用資撫摩以兵備整飭之有無穩便或改移衛

所定爲世守以大將彈壓之是否可行文武官員何地可以更調共圖化理軍兵戍卒何處可以遷改以實營屯儒學驛遞原有者作何查復土同知安撫長官見存者應否帶銜衙門倉庫城隍旗纛作何建立城垣橋梁道路作何修理官吏俸糧作何派徵門皂徭役作何編取合用經費錢糧作何動支應委董理官員作何遴選與夫疆界作何清查以免越占田土作何清丈以杜奸欺何民土當給還何賊產當籍沒孰宜招人領種孰宜充作屯田降夷作何鈐治地方作何轄屬事體有無穩便人情有無相安務在用夏變夷長慮卻顧凡有益於一方真足以奠安長久者

釐爲數事希於旬日內開款回報軍門以憑覆議會題施行若有窒礙難行者亦希明白見示幸勿遺漏遲延

黔省善後

爲集議建置善後事宜以圖久安長治事案照先該本部院看得播賊旣已蕩平例應改土設流行據川湖監軍守巡等道條議前來會題間適本部院感疾伏枕未得題請近閱邸報該山西道御史李具題議建二府又准貴院會稿亦議建設二府輿論旣已僉同卽應如議舉行及查割撥一節以黃平設府餘慶白泥雍水重安設縣此中尙有草塘容山雖未叙出稽之輿圖似亦在內并龍泉設縣俱

應屬之黃平隸於貴省但賊滅之後已及四月若不及時
修舉恐地廣人稀日久生變一有他虞反爲不便除白田
壩建府松坎建縣與湄潭等處凡係播州五十四里之地
及眞州一司俱聽四川分屬已經委官推官高折枝同知
張鼇知縣寇克順何珩分投往彼料理外所有黔省應委
守巡參備知府知縣等官勢不可緩合行移知爲此合咨
貴院煩將黃平餘慶等司應建郡邑速爲委官及時董理
共圖治化仍將選擇過文武職名并查草塘容山二司屬
何縣治希由併示以憑稽督施行

平播全書卷七終